


Иван Коданёв



ТЫЛӨН  
ГУСЯТОРЪЯС





Иван Коданёв

# ТЫЛӦН ГУСЯТОРЪЯС

ВИСЬТЪЯС

КОМИ КНИЖНОЙ ИЗДАТЕЛЬСТВО  
СЫКТЫВКАР 1970

## Миян том лыддысьсь!

Тэнад кыш коми гижысь Иван Васильевич Коданёвлөн выль книга, кодös артмöдисны вör-вайылысь кызь кык висьт. Миян издательствоын И. В. Коданёв лэдзис унакодь книга, на лыдын «Югьд войяс», «Вör-вабд ветлігöн», «Водз чеччан — унджык аддзытан», «Войвылö воис тулыс». Найös сідз жö гижöма челядьлы лыддьöм вылö.

«Тылөн гусяторъяс» книгасö лыддигöн тэ гижысьскöд тшöтш волан Юромка ю дорö и Паньö грездö, пукалыштан юяс да тыяс дорын, пöшта на пöсьджыка кутан радейтны ассьыд вör-ватö, сылысь мичсö, зумьдлунсö.

Лыдды книгасö помöдзис да, воас оз сійö гэн сьöлöм вылö, гиж миянлы. Адресным важыс:

Сыктывкар, Печать керка, Коми книжнöй издательство.



## ТЫЛӨН ГУСЯТОРЪЯС

Ме төда өти ты. Сійө гөгрөс да джуджыд, ваыс дьөгөдь рөма. Тысө кытшалөмаось сирөд козьяс, кыз дөрөм-гача нияяс, мылькъяс да гөраяс. Берегыс изъя, быттьө кодкө нарошнө тэчөма найөс татчө.

Төдса пөль висьтавліс меным, мый тыас олө сир, кодлөн нитшкасьөма нин юрыс. Эмось и сьөд ёкышъяс. Кор дзик на первойысь вои вөр пөвстө дзебсьөм тайө ты дорас, дыр видзөді сы вылө.

Вөлі лун шөр бөр на, а тані рытын моз лөнь. Весиг шонді югөръясыс стенөн сулалысь вөр пөвстөдыс оз вермыны писькөдчыны сэтчө. Шойччис ас кежас ты, некыті оз вөрзышт, лөсталө, быттьө выя бордйөн мавтөмаось сійөс. Көнкө дзик матын клөнөдчыштіс ёсь ныра сьөд сизь. Тыдалө, пучөйясөс корсис, сәсея и сійө дугдіс уджавны, кытчөкө мөдлаө лэбзис. И бара лои лөньсьыс-лөнь.

Матыстчи ты дорас. Өшөді пищальбс коз пу  
вожйө, пукси нитшкөн вевттысысьом гөгрөс из вылө.  
Думөн виччыси өтитор: «Вот-вот ты шөрын ызөб-  
тас багатыр сир, петкөдлас ассые вынсө. Пөль кө  
аддзывлөма сійөс, мыйла и меным не видзөдлыны?  
Сэки, дерт, кута веритны». Но тые важ моз чөв  
олис.

Видзөда ты вылас да думайта: «Кутшөм туйөд  
воисны татчө чериясыс, кор тыас оз визувт неку-  
тшөм шор да и ни өти ю абу матигөгөрын? Коді пө  
рөдмөдіс тыас сирьясөс, ёкышьясөс, өд сійө дзик  
өтнас вөр пөвстын, оз киась ни гөститчы мукөд  
тыяскөд? Мыйла чериясыс оз пөдны кузь, көдзыд  
төлын, кор тысө дорас ён йи да вевттыс кыз лым?  
Коді сетө сөстөм сынөдсө, медем видзны тыын  
олысыасөс кулөмысь?»

Заводиті төгөр дзорьявны. И сэки син улө уси  
ты бокө ляскысьөм ва гуран. Муні сэтчө. Да тайө  
тай ключ. Вайе сәні синва кодь сөстөм, сэтшөм  
көдзыд — юшті да лолөй сувтліс, пиньясө ён-  
тыштіс.

Лои гөгөрвоана өти гусятор: чериясөс пөдөм-  
сые видзө тайө кувлытөм ключе, коді, дерт, и төв-  
нас оз кынмыв. Да и ключе, вөлөмкө, абу өти,  
чөй-вокьяс сылөн эмөсь. Сідзкө эм кытысь тылы  
бөсьтны сөстөм васө, колама сынөдсө.

Көсий нин мунны ты дорысь, ыджыд сирьяс  
сідзи и эз ызнитлыны. Гашкө, некод и абу сәні,  
пөрысь мортыд вермис ылөдлыны. Эг на удит кут-  
чысыны пищаль дінө, юр весьті лэбзисны горда  
пара. Найө вөчисны вель ыджыд кытш да шывгы-  
сисны-пуксисны ты помас. Лыйөм йылысь ни-  
нөм и вөлі думайтны, ылынөсь, дрөбйыд оз судзөд  
найөс. Пөльтикасьөны уткае, сюйласны нырьясны-  
сө ва пытшкө, пыркөдөны юрнысө, а асьныс ты

шөрланьыс уйёны. И сэки юрö воис мөвп: гашкө, уткаяс либö юсыяс и рöдмöдiсны черияссö, бордъяснас да паськыд кокъяснас вайисны татчö мукöд тыясысь черияслысь пöкъяссö? Сэссия пöкъяссыс быдмисны гырысь сиръяс, ёкышъяс. Дерт, көнкө, налөн тайö уджыс.

А горда пара матыстчöны и матыстчöны, тшапöсь, мичаёсь, голяяссö неуна кусыньтöмаёсь, клопöдчöны бордъяснас. Век кöть видзöд на, вылö. И сэки лои виччысьтöмтор: ызöбтiс кодкö ты пытыкысь, тшапнитiс-кутiс öти уткаös, бөр воши, сöмын валөн кругъясыс колины сэтчö. Мöд гордаыс ас ногыс повзёмөн горöдiс, öвтыштiс бордъяснас, пуляөн кыпöдчис вывлань. Сэссия дыр на кытшлалiс ты гөгөр; колökö, чайтiс, мый торш сир жалитас сылысь пöвсö, бөр лэдзас вомсьыс.

Тадзи менам синъяс водзын помасис олöмыс шöвк морöса гордалөн. Ме, кöть и пицальöй вöли орччөн, нинöмöm эг вермы отсавны сылы, мездыны мудер да лёк сирысь, кодъясöс асьныс жö уткаяс рöдмöдiсны, олöм налы сетiсны.

Со кызди таысь мынтысис сир. Тайö аддзылöмторйыс пыр на син водзын.

## Б У Р С И Ö М

Чов ю абу ыджыд. Татшöм юяссö паськыд Коми муысь позьö аддзыны унаös: Печораысь и Удораысь, Сыктыв вожысь и Эжва катыдысь. Ю, кызди ю, заводитчö көнкö Кокуль сайын, а помасьö Сьöрт полыйын, Емваль посёлок весьтын.

Первойсö сійö визувтö тшемөн сулалысь парма-  
яс пöлөн, сэсса матыстчылö видзьяс дорö, дыр  
кытшлалö-чукльöдлö ассыс мунан туйсö. Кыті по-  
лігтыр визувтö, кыті и тэрмасьöмөн котöртö. Мукöд-  
латыс дзикöдз надзмыштлас, быттö сувтыштлö  
думайтны, кодарлань веськöдчыны водзö.

Тулыснас юис збой, усьласьö берегьяс, видзьяс  
вылö, быдөнöс пöдтыны көсйö. Лым сьлём бöрас  
сійöс юкталöны вöрса лыдтöм шорьяс, содтöны  
вынсö.

Гожöмнас, дерт, бөр косьмас, омöльтчас, вет-  
лысь-мунысьясöс посйисьтöг и лэдзас вуджны ас  
вомöныс. Сэки ю пыдöсын куйлысь изьяс кыпöдас-  
ны гөрбнысö, чургöдчасны-петкöдчасны колодаяс,  
вутшьяс — көні мый эм. Сöмын кытчöясöкө йирьяс  
кольöны, черияслы патераяс да дзебсяніньяс.

Тайö юис меным друг кодь муса. Сыкөд йитчö-  
маöсь уна казтылёмьяс, шуда часьяс да луньяс.  
Вöрالیгьясөн да вотчигьясөн эг этша километр вось-  
лавлы сы берегьяс пöлөн, кымынкö пöсь войт усь-  
көдлі сэтчö. Узьывлі пушкыртчöм козьяс улын,  
выльөн на чöвтöм зорöдьяс бокин. Кывзывлі пар-  
маислысь да юислысь аслысьяма сьылёмнысö,  
гажöдчөмнысö.

Важысянь ми Чов юкөд тöдсаöсь. Май тöлысь  
помын на, кор юис öдйö заводитас ямны, ми, че-  
лядь чукөр, воывлім сэтчö вуграсьны. Коллявлім  
войяссö бипурьяс дорын, сөйлім пöжалём карту-  
пель, юксьывлім ас костаным вöлөгаясөн, кодлөн  
мый вöлі сьöрсьыным.

Во нелямын сайын Чов ю бокас миян видз вöлі.  
Мамö быд тожöм босьтлывліс аскöдыс сэтчö и менö.  
Пуктам туйсö рыська йöв, сюям сумкаö некымын  
иднянь, босьтам коса да куран и петам туйö. Горт-  
сянь мöдöдчам шонді садьмигас на. Дыр лöвось-

лавны векныдик вѳрса туйѳд, уна шоръяс вомѳн вуджны, кияс мудзтѳдзыд вѳтлавны горш номъясѳс, унаысь копыртчывны туй вылын мешайтчысь пуяслы. Менам сѳѳрысь и вугыр шать и нидзув доз, найѳс видза синъясѳс моз.

Мамѳ заводитас ытшкыны, менам, дерт, оз на тырмы вынѳй косаѳн ѳвтчыны. Но прѳстѳ ог ов. Босьта кыйсян угоддьѳс, муна ю дорѳ. Пѳсь лыа вылысь нетшышта паськыд лапкор, картуз пыдди сійѳс юр вылѳ пункта, сѳсся кывзышта лѳбачьяслысь сьылѳмсѳ, чиркъяслысь варовитѳмсѳ — и пыр жѳ удж бердѳ: комъясѳс кыйны.

Уна сѳки вѳлі рѳдмѳма Чов юын тайѳ ѳн да мича чериыс. Муртса на удита шыбитны вугыр шатьѳс ваѳ, кодкѳ сунгас нин пробкаѳс. Лѳпта, а вугырын пань кузя яя ком. Час-мѳдѳн матѳ ведра джын лѳптала, ѳбедайтѳгѳн мамѳс чѳскыд юкваѳн гѳститѳда, туйс тыр на запас солала, медым гортѳ нуны.

Сійѳ кадсянныс унаысь нин кынмывліс да бѳр вѳссывліс чож ю. Коді тѳдас, кымын во нин ме эг пукавлы сѳні вугыр шатьѳн.

И кодѳс вѳлі кыйныс? Мыйѳн Чов ю кузя кутісны лѳдзны вѳр, комъяс кытчѳкѳ пыр жѳ вошины. Тыдалѳ, эз во налы сѳлѳм вылас татшѳм олѳм-вылѳмыс, кор юсѳ тыртісны керъясѳн да кырсьясѳн, потшлісны уналаті, чериас эз вермыны та вѳсна кайны ни лѳччыны. Комыд ѳд абу сѳтшѳм, медым овны да быдтысьны няйтѳсь да лѳптѳсь юын, сылы сѳстѳмин колѳ, медым немтор эз дѳзмѳд, нинѳм эз мешайт.

Дзикѳдз бырлі ичѳтик юысь ком. Сѳтчѳ сѳмын кольлісны сирьяс, кельчияс, ѳкышьяс, и то важ серти ѳна этша.

Сѳсся тай коркѳ дугдісны жѳ лѳдзны вѳрсѳ ю кузя, машинаясѳн кутісны лѳччѳдлыны Вылыс Чов-

йодз. Вочасөн бөр кутіс сөдзны ваыс кедзовтлём юысь.

Кольём арнас ассыым отпускөс ме бара коллялі татчөс төдса местаясын, вөралі, тшак да пув воті. Оні көть он нин аддзы сэтысь вөрзьөдлытём парма-ястө, гажа ягъястө, но абу на дзикөдз гольмөмаөсь тайө местаясыс зверь-пөткаөн, быд пөлөс вотөсөн.

Буретш вөлі рыгъявыв. Шондіыс тэрмасис нин саймовтчыны. Ме восьлалі Паньө грездлань, көні узьмөдчыны эм ичөтик пывсян. Тэрыба восьлалі вөралысьясөн да турун пуктысьясөн талялём туй кузя, коді муніс дзик ю бердөдыс. Лолалі морөс тырөн вөрса сынөднас, мудзём эг кыв. Кокъясөй асьныс и нуисны, ноплысь и пищальлысь сьөкталун-сө весиг эг кыв.

Заводитөмаөсь нин гылавны пуяслөн коръясыс. Пуясыс то вижөдөмаөсь, то öзйөны гөрд краскаөн, быттё шондіыс кольёма налы ассыыс ломалысь серьяссө. Лөсьыд да кыпыд татшөм каднас вөр-ваын, томмылан быдсөн, эбөсыд содө.

Виччысьтөг ю дорысь кыліс музыка шы. Сера-мөй весиг петыштліс: коді нин гажөдчө сәні? Мат-тыстчи музыка шылань; кор вои, сувті берег дорас. Сәні пукалө морт, сьөд шляпаа, ватника, кокас кузь гөленя резинөвөй сапөг, бокас пуктөма ичөтик ра-диоприёмник, вабергачө лэдзөма шатиньяс, гырысь гөрд пробкаяс качайтчөны ва веркөс вылын.

— Он-ө нин музыка шы улас лягушаясөс кый?— заводиті шмонитны берег дорын пука-лыськөд.

Вуграсысь бергөдчыштліс мелань. Чужөмыс сылөн зөв на том, синъясыс сөдз енэж рөмаөсь, киясыс ёнөсь, ыджыдөсь. Эз на удит менам шмонитөм вылө висьтавыны воча кыв, кыдзи өти пробкаыс

вөрзис места вывсьыс да кутіс тювны-кайны ва паныд.

— Лэпты!— горөді ме.— И сэк жө юр вывті, эжа вылө, уси кутшөмкө вель ыджыд чери. Босьті сійөс киө и синъяслы ог эскы: кийн пессис ком.

— Вот тэныд и лягуша...— шуыштіс зон да юрсьыс шляпасө лэдзыштіс увлань. Ме сылы мыччи черисө.

— Сумкаас шыбит.

Нюжөдчи сумка дорас, паськөдышті да бара куті шензыны: сэні вөлі нин дас кымын ком, кыз-өсь, мичаөсь.

— Рөдмөма, бөр рөдмөма комыд,— радлі ме.

— Кыдз аддзан. И төрыт мем ичөтика шедыштіс.

И сэк меным дум вылө усылі челядьдырся кад-өй, Чов юбокса ичөтик видз, комъясөн мамөос чөс-мөдлөм. Бур, мый дзыкөдз абу бырөмаөсь комъяс, кужөмаөсь видзны асьнысө.

## ЮРОМКА Ю ДОРЫН

Ылөдз нюжөдчөм парма пөвстөд чожа визувтө неыджыд Юромка ю. Тулыснас сэтчө мөдөдөны ассыныс вынсө вөрса шоръяс. Гожөмнас юыс ёна чинө, весиг подөн позьө вуджны.

Пуксян кө Сыктывкарын автобус вылө да мөдөдчан Княжпогостлань, тайө юыскөд паныдасян Щукино грезд дорын. Буретш тани сійө вундө мир туйсө, сэсся веськөдчө увлань, медым өтлаасьны аслас Эжва мамкөд.

Юромка ю пöлөн кöть вöрсö ёна нин куштöм-  
öсь, но паныдасьлан на мича ягъяскöд. Тулыснас  
да гожöмнас тані лöнь, оз кывны вотчысьяслөн  
гöлöсьяс. Сöмын корскюрö мурзігтыр мунасны вөр  
тыра машинаяс, ас бöрсяыс колясны лэптöм бус-  
лысь кузь вöнь.

Зато арнас, быд шойччан лунö, татчö волöны  
уна вотчысь да вöралысь. Местаясыс тані озырöсь  
тшак-вотöснад. Мукöд дырйи пожöма ягъясö петас  
сы мында масленик да виж гоб — гөгөр сярвидзö-  
ны. Öти здукөн кöрзинатö позьö тыртны. Сюрлöны  
и кыз кока еджыд гобъяс, солалан тшакъяс. Пыра-  
лан кö козъя вөръясö, кыскымöныд позьö петкöдны  
пув. Эмöсь и нюръяс, кодъяс озырöсь турипувйöн.  
Да и зверь-пöткаыд абу на вешйöма татысь. Пища-  
ля войтырлы эм кöні бурмöдны сьöлöмнысö.

Сентябрь заводитчигөн ми Егорович другкöд  
локтім татчö вотчыны. Кыкнанным буретш вöлим  
отпускынöсь. Луныс сулаліс мелі да шань, весиг  
тöв чöв усьöма. Енэжыс мыссьöм чужöма, некöні  
кымöртор абу, быттö шондйыс вöтлöма найöс  
кытчöкö ылі муясö. Татшöм поводдянад вöрад  
торъя лöсьыд, он кöтась, он кынмы.

Веськалім пув позйö. Местаыс абу и ыджыд, а  
вотöсыс синъястö ёрö, ки тыра розъяöсь, польдчö-  
маöсь.

Гашкö, эськö дыр на копрасим вотöсьяслы, но  
арся поводдяыд пöръясьысь. Эг и казавлöй, кыдзи  
енэжсö кутісны гөгөрбок топöдны мисьтöм кымөръя-  
яс. А недыр мысти сяркнитіс вына зэр. Кöтасисны  
паськөмъяс. Дзесбылім жö эськö пу улö, но и сійö  
регыд письтіс. А поводдя кратайтчö и кратайтчö,  
асныра вöv кодь, оз и кöсйы бурасьны.

Ми вöсьлалім вөр кыскалан важся туйöд. Шо-  
чиника быдмысь пуяс костын шыввидзис еджыд

ялаон вевттьом яг. Енэжыс бөр нин воссъыштис, от  
төд, дыр-ө кежлө. Пуяс вылысь төвлөн быд пöльыш-  
төм бöрын гылалисны ва вoйтъяс.

— Сувтлы!— вашнитис меным Егорович. И сэки  
жө öтпырйö моз кынмим места вылө. Пöрөм вужля  
бокын, миянсянь зэв матын, пукалис кутшöмкө  
ыджыд лэбач да эз и думайт лэбзыны, юрсö копыр-  
тöма, некытти оз вöрзöд.

— Кöндозмөр! Эк, пищальтö эг босьтöй.

А дозмөр быттö синтөм и пельтөм, некытти оз  
вöрöшит. Дивö, мыйла нö сы дыра оз лэбзы? А  
асьным кок чунь йылын каньяс моз матыстчам сы  
дорö. Кор коли пöтка дорöдз воськов-мөд, уськөд-  
чим сы дорö. Дозмөр эськө кöсйис кытöдчыны, но  
сёр нин вöли, шеди менам киö. Ми видзöдим сы вылө  
да дивуйтчим.

Ме матö комын во вöрала, быд во уна лун кол-  
лявла пармаясын, аддзывла быд сикас пöткаяссö, а  
вот татшöмторсö аддза первойсысь. Пищальтöг кый-  
ны дозмөр, абу öмöй тайö дивö!

Дыр видлалим, абу-ö пöткалөн рана туй, эг  
аддзöй. Гашкө, сэтшөм чорыда узис, мый эз казая  
миянлысь матыстчöмнымöс. Колökö, сёйис лөк во-  
тöс да висьмис либö кучкысис пуö и эз вермы лэб-  
зынысы?

Быдторйыс вермас лоны. Кужис кö эськө ачыс  
дозмöрыс висьтавны, сэки, дерт, ставыс гөгөрвоана  
лои.

Но тайö гусяторйыс сидзи и коли тöдмавтöг.  
Юромка юкөд менам йитчöма и мөд тешкодьтор.  
Тайö абу жö шмонитөм. Кольöм ар ми, нель вöра-  
лысь да тончöй пон Манька, волим татчö кöч кыйны.  
Кузь пельяс бөръя воясас рöдмисны унакодь, частö  
аддзывлан найöс вотчигъясөн.

Муртса на кежим вöрас машинаысь да заради-

тім пищальяснымос, кыдзи тэрыб кокъяса Манька кутіс исавны мусо, сэсся уськөдчис водзө и недыр мысти сетіс нин ассыс ён гөлөссө.

— Көчөс кыпөдіс. Вайө зільджыка петөй кушинас,— сетіс индөд вөралысьяс пиысь медся олөма морт. А понлөн гөлөсыс юргис парма пасьтала, то кылас өтилайн, то шыалас мөдлайн.

Гашкө, быдса час ми сулалім да виччысим көчлысь петкөдчөмсө, но кузь пельөс сідзи и эг аддзылөй. Локтіс миян дорө Манька, кывйыс нюжалөма, шоньд пасыс вазьөма, лолалө сьөкыда. Ёна мудзтөма коньөрөс мудер көчыд.

Недыр мысти сэсся кыпөдім мөд көчөс. Сійө чеччыштіс пөрөм лу бокысь, ён кокъяснас мөдіс пызйыны ю пөлөн. Көть и эз на вөв лымйыс, көч дзик нин еджыд. Сійө пышйис миянысь сэтшөм өдйө, некод весиг эг удитөй лыйны. Манька чеччаліс да гораа увтчигтыр вөтчис повзьөм көч бөрся. Ыджыд кытш вөчис кузь пель. Дыр на лявгис-горзіс скөрмөм пон, сэсся дугдіс увтчыныс, тыдалө, бара воштис көчөс.

Дөзми татшөм вөралөмсьяс. Коктө песан, а төлкыс абу. Отнам мөдөдчи ю пөлөн вывлань, гашкө, мися, сьөлаясөс кытыськө аддза, найөс көчьяс дорсыд кокныдджык кыйныд.

Тэрмасьтөг шливгис-визувтіс вөрса ичөтик ю. Вына төв вөрөдіс пуяслысь косьмөм корьяссө, копрөдліс вөсни кокъяса дзоридзьясөс, кодьяслөн бырөма нин выныс. Увтас местаяссянь пөльтіс васөд сынөд.

Синьясөй казялісны көчөс. Сійө котөрөн петіс вөрысь, лэччис лыа көса дорө, сэсся дыр думайттөг уськөдчис ваө. Радөйла ыркнитліс сьөлөмөй.

Көч петіс ю шөрлань, тэрыба шенасис кокъяснас. Васысь тыдалісны чургөдчөм пельясыс, ичөтик

юрыс да гөгрөс мыш вылыс. Любө вөлі видзөдны, кутшөм зіля да кокниа варчө көчильөй-чоильөй. Манька понйысь, тыдалө, пышйө, көсйө воштыны ассыс кок туйсө. Көдзыд васыс со эз повззы.

Тәрмасьөмөн мөдөдчи берет пөлөн. Көч эз нин тыдав, удитіс петны кос местаө. Пөрөм пуяс да сук кустьяс эз лэдзны менө өдйө мунны. Вои места вылас, кыті дзик на неважөн вуджис көсйө, а кузь пель некөн нин эз тыдав, воши, быттьө му пырыс муніс. Гоннялі гөгөр, шутөвті, а көчөс сідзи и эг аддзыв. Немтор он вөч, быдөн өд көсйөны овны.

«Видла сьөлаясөс чуксавны,— думышті ме.— Татшөм лөсьыд вөрас, дерт, найө эмөсь». Заводиті чипсасьны. Сьөла кыліс менө, вөсньыдик гөлөсөн шыасис ю сайын. Дзевси кыз пожөм сайө. Вель дыр пукалі да чипсаси, но сьөла сідзи эз и матыстчыв.

Колө вуджны ю сайө, колөкө, удайтчас аддзыны чипсасьысьясөс. Но дженьыд гөленя резинөвөй сапөгөн ойдөм ю сайө вуджны эг вермы. Гумовтан арся көдзыд васө сапөг пытшкад, ковмас час-мөд косьтысьны бипур дорын. А вөралігөн быд минут дона.

Пукті берег дорө пищальөс да рюкзакөс, заводиті кыскавны потш кодь вөсньыдик кос пуяс, медым вөчны ю вомөн пос. Гашкө, дасысь петалі берегас. Дыр көть нокси, а вуджанін век жө вөчи.

Ю дорө ляскысьөм ичөтик вутш дорын, коді мясянь вөлі дас оськов сайын, мыйкө друг вөрзис. «Абу-ө нин көчыд сэтчө дзевсьөма?» Но пищаль дорө эг котөрт, а веськөдчи вутшлань, көні тыдаліс кутшөмкө еджыд пас. Сідзи и эг во берегөдзис. Көч чеччыштіс кыр йылө, петкөдліс меным бөр кокьяс-сө. Шуөны, көч пө медся полысь зверь. Та бөрын ог эскы. Полысь кө вөлі, эз та дыра мушвидз мясянь

дзик орччөн. Гашкө, думайтис, мый Иваныд оз ад-  
дзы сийөс.

Ог төд, мый думайтис көч, а менам сьөлөмө сийө  
колис медся бур казьятылөмьяс.

## АС КОКЪЯСНАС ЛОКТИС

Нейджыд ю бокин, сиктсаянь зэв ылын, сулалө  
вөралан керка. Сыкөд орчча амбар — пөткаяс видз-  
өм ылө.

Вөралан керкаын арсяньыс тулысөдз уна во чөж  
нин олө Архип пөль. Көть сизимдасөд ар сылы, а  
кыйсьөмысь оз энотчы. Быд ар пукталө зверьяслы  
капканьяс, окталө налькьяс, сьолаясөс, чукчиясөс  
кыйö петляөн.

Радейтө пöрысь морт пармасө. И кызди сийөс он  
радейт, кор матө ветымын во прöмышляйтө öти  
местаын. Быд шор да пу сылы тани төдса. Уна казья-  
тылөмьяс йитчөмаөсь чөла вутралысь ягыскөд.  
Төвнас пармасө вевтясны помтөм еджыд эшкынөн,  
некутшөм туйяс оз лоны, паськыд лампатөг мунны  
ни локны он вермы.

Водз асывсянь пемдытөдзыс Архип пөль лампа  
ылын. Видлалө капканьяс, налькьяс. Бергөдчас  
вөр керкаө, ус-тошкыс гьöртөма, кокьясыс мудзö-  
маөсь. Но прöмыстөг некор оз волю. То мешöкас  
куйлө небыд бöжа руч да кузь пельяса көч, кор-  
сюрö налькйö шедлывлө лым кодыс жö еджыд  
сьөдбөж, шочиника капканö веськавлө и медся му-  
дер зверь — тулан. Сэки нин пөльöлы сьөлөм ылас  
праздник. И сьöла-тарөн тайö чөв пармаыс озыр.



Лунтыр ветлігад кодкө пыр нин вөралысьлы мушка вылас сюрө. Да и арся кыйөм пөткаясыс на сылөн амбарас өшалöны.

А вот талун вөралысь шогө уси. Пөсявтөдзыс ветлөдліс аслас төдса туйөд, видлаліс став октөмторьяссө, но некод абу. Öти капканө эськө веськавлөма кодкө да капканнас сідзи и мунөма. «Дерт, көнкө, санлөн тайө уджыс,— зверлөн кок туй сертиыс гөгөрвоис вөралысь.— Ылөдз оз мун, суөда. Ме өд и ачым на сюсь».

Сэсса заводитіс вөтчыны зверь бөрся. Небыд лым вылын бура төдчис санлөн кок туйыс, капканнас быттьө гөрөма лымсө.

Заводитіс рөмдыны, сьөктаммис лампаыс, а пышйысьөс суөдны некыдз оз вермы. Бөр керкаыс коли ылө бөрө, вот-вот дзыкөдз пемдас. Жаль пөльлы воштыны зверлысь кучиксө да капкансө, а вөчны нинөм оз вермы. Жаялі дзыкөдз пөрысь морт, пу улө көть вод да узьмөдчы. Ковмис бергөдчыны бөр вөр керкаө.

Оз узьсы пөльлы татшөмтор бөрад. Войбыд бергаліс нар вылын, быд ногыс видіс мудер санөс. Öдзөссө унаысь восьтыліс, поліс, мед көть турөб эз кыпты. Сэки нин нинөм ылө он аддзы капканөн пышъялысь зверөс. Но войыс вөлі лөнъ да шоньд. Ланьтөма, чөв усьөма парма. Гөгөр шыч ни рач. Асьявылыс нин личкис унмыс, но, гашкө, дасысь садьмыліс, бергаліс бокъяс доймытөдзыс.

Югдыштөм бөрас петіс ывлаө. Лым абу усьөма, быттьө поводдяыс кылөма пөльлысь майшасьөмсө да жалитөма сійөс. Сідзкө, зверөс позяс туявны водзө. «Төрыт эз сюр, талун сюрас»,— ас кежас воровитіс Архип да тэрмаситтырйи ыркис пөртйысь көдзалөм шыд пьдөс. Сэсса пась зептас суйис яйтор да нянь и бара сувтіс лампа ылө.

«Он пышйы, мудерпоз. Бөж вылад регыд тувча», — такөдіс асьсө вөралысь. Саныд сылы важся враг. Арнас на матө дас чукчи да съола пышйөдіс лэчьясьсыс. Пакөститчө, гусясьсө, а ачыс өнөдз эз шед.

Төрытъя лампа туйыс төдчис зэв бура. Сы кузя и мөдөдчис пөльө, тадзнад кокныдджык мунныс. Дыр-ө, регыд-ө муніс, а коркө сәсся воис и ыджыд мыр дорө, коді ылісянь на тыдаліс шочиник вөр пөвстөд. Төрыт татысянь и ковмис бергөдчыны вөр керкаас.

Мыйкө дыра шойччыштис мыр вылын, сәсся мөдөдчис зверөн кольөм пасьяс кузя. Ачыс мөвпалө өтитор йылысь: «Абу нин көнкө ылын, оз өд тырмы выныс капканнад собны джуджыд лым кузя, жаялас кытчөкө».

Шорбокса өти вужля улын сан узьөма, ас улас южмөдөма лымсө. Төрыт кө эз су пемыдыс, колөкө, татчө и суөдіс сійөс вөралысь пөль. Долюдджыка кутіс тіпкыны сьөлөмыс пөрысь мортлөн, тэрыбмисны кокъясыс.

Кытыськө дзик матысь кыпөдчис сьөд тар, лым пиас шойччөма.

Пөльө восьлаліс водзө. Муныштас мыйкө мында, сувтас да кывзыштас. Некөн оз кыв.

Сійө сэтшөма вөтчис зверь бөрся, мый эз и казявлы, кыдзи гудыртчис енэжыс, сәсся кутісны гылавыны гырысь лым чирьяс. Недыр мысти войвывсянь пөльыштис вына төв, кутісны копрасьны гырысьджык пуяс, кучкалісны өта-мөдсө ловпуяс, вөсныдык кызьяс, быттө мыйыськө зыкө воисны.

Енэжсянь коясисны сэтшөм зіля, синъястө восьтыны он вермы, турөбысла ставыс мөдіс гартчыны, омляліс пармаыс ён гөлөсөн. Пөльөлы ковмис саймовтчыны ас кодыс жө пөрысь коз улө. Зверөс

водзё туялём йылысь нинём и думайтны, здукён тыри санлөн мунан туйыс. Кёртвомавны коть ывласё вильыш вёлёс моз, да оз тырмы выныд.

Дыр куткырвидзис пöль кыз пу бокин, тöлыс летис сылысь пась пöласё, ворсöдчис дзормём тошнас, чеплялис чужёмсö.

Чукля пожём вылö пуксис сыръя бöжа катша да мöдис нерны пу сайö саймовтчём мортöс. «Катш... катш... катш...» Пöль чургöдлис сылы пищальсö, катша öдйö усйысис.

Дыр кыссис пöль аслас керкаö. Унаысь сувтлис шойччыны, лэчыд вой тöv писькöдчис морöс бердöдзыс, дöзмöдчис лым.

Сувтис пöткаяс видзан амбар дорас да чуймис: öдзöсыс гурйыв осьса. «Эз-ö нин кодкö гусясьны пырав сэтчö?»

Лямпасö сувтöдис керка бокас, ачыс тэрмась-öмөн веськöдчис амбарас. Пырис пытшкас и кутис сюся видзöдны. Гөгөр туплясисны пöтка гөнъяс. Пöль эз на удит водзлань вöчны и öти оськов, кыдзи амбар пельöсын мыйкö зилькмуні. Кык ичöтик син видзöдисны вöралысь вылö. Архип пöль пыр и тöдис асьыс важся врагсö. Сан локтöма аслас кокъясөн веськыда вöралысь амбарö, весиг капкансö вайöма сьöрсьыс. Дерт, көнкö, сёян корсьём могысь, тшыг кынёмнад дыр он гуляйт. Дась кыйём пöткаяснад кокныдзык чöсмасьныд.

Архип пöль нюжöдыштис веськыд кисö водзлань, сэсья копыртлис зверлань юрсö.

— Видза-олан, сідзкö, мудер сан, кузь гöна тун. Кöсйин гусясьны, но эз артмы. Öнi пасьтö ковмас ме ордö кольны. Меысь некод на эз пышйыв, кокыд дженьыд.

Тадзи, ньöти виччысьтöг, пöрысь вöралысь кыйис ещö öти зверöс. Ас кокъяснас сійö локтис.

## ГӨРБА НЫРА ЛЭБАЧ

Велөдчысьяс пиысь быдөн, дерт, төдöны попугайöс. Сійö гөрба ныра, мича паськöма, велөдан кö, весиг кужö шуавны öткымын кывъяс. Зоопаркъяс-ын сы дорысь пыр позьö аддзыны челядь котырöс. Йöзöс аддзöм бöрын шоныд Африкаысь вайöм попугай клеткаас заводитас гажөдчыны, дурны. Мунны сы дiнысь абу окота, сэтшöм сійö мича да пельк.

Миян войвылын олöны жö татшöм гөрба ныра лэбачьясыс. Найöс, дерт, попугайöн оз позь шуны, эм асланыс ним: уркай. Тайö лэбачьясыс попугай дорысь ичötöсь, да и оз ёна синмö шыбитчыны. Олöны найö медсясö козъя вөръясын, кöни тырмымөн быдмöны кольяс. Паськöмныс налөн мича жö, торъялöны мукöд лэбачьясысь. Шуöны тайö лэбачьяссö уркайöн сы вöсна, мый найö уръяс моз жö пöткöдчöны кольясысь судзöдöм кöйдысьясөн, пырджык олöны пуяс вылын. Кутшöмкö воö кö оз артмыны кольясыс, вешйöны мöдлаö, кöни кокныыджык судзöдны сёян. Чиганъяс кодьöсь найö, оз радейтны овны öти местаын.

Уркайяскöд ме төдмасьлі уна во сайын нин. Кыдзи тайö лой, висьтала ставсö. Олі ме сэки сиктын. Тiян моз жö котралі школаö, кöни вöлі сöмын нель класс.

Начальной школа помалöм бöрын мамöлы зэв окота вöлі, медым ме велөдчи водзö, пыри карса мöдöд тшупöда школаö. Но мый вылö велөдчыны батытöм пины? Сэк öд эз на вöвны öнiя кодь интернат-школаясид.

— Вот мый, пиук,— шыасис кыдзкö ме дiнö Ольöксан дядь.— Тöвнас каям мекöд вөр лэдзны, кыскасысь меным колö. Кынöмыд лоö пöт да сьöм-

тор на мынта. Уджыштан кө, мөд во карө верман мунны.

Меным любөйд! Кодлы нө абу окота велөдчыны карса кыпыд школаын?

Мыйон пуксис төвся туй, Олюксан дядьё сөвтис Ворон вөвлы турун, тэчис вөлөга и водз асывнас ми эновтим гортнымос. Миянкөд тшөтш кайисны сортовка лэдзны Чугун Ёгор да сылөн вокыс Петыр, ар кызя кымын ён зон, кодлөн кулакыс кага юр ыджда лоө.

Рыгнас нин воим Кокульё. Сюркнясьём ичөтик Чов ю бокын сулаліс ляпкыдик керка. Сэтчө и овмөдчим. Сэсса заводитчис быд лунья съөкыд удж. Ёгор да Олюксан дядь пөрөдчисны, а ми Чугун Петыркөд кыскалім пөрөдом вөрсө вөвьясөн катище вылө, коді вөлі миян вөр керкасянь матын. Пемдытөдзыс куимысь удитам кайлыны пөрөдчысьяс дінө. Ме, дерт, омөлик отсасьысь вөлі, верма сөмын вөлөс веськөдлыны. Пөрас кө вөлі доддьой шыбельё, Петыр өти здукөн и бөр лэпталас керьяссө местаас.

Петыр эз сөмын торьяв аслас ёнлунөн, но вывти ёна радейтис и вөрса лэбачьясөс. Керка дорө быд лун сійө киськавліс зөр, нянь крөшкияс, чай сук. Лун-лун сәні пируйтисны биа гөрд морөса жоньяс, ичөтик пыстаяс, гөрба ныра уркайяс. Кыдзкө өтчыд нетшышти вөвлысь бөжсьыс некымын си да вөчи лэч, медем кыйны лэбачьясөс. Петыр аддзис лэчкөс, мисьтөма видзөдліс ме вылө да шыбитіс вөчөмторйөс пачө.

— Эн и думайт пакөститчыны. Тәнө кө садөкө сюя, мый кутан мойдны? Мед гажөдчөны, сьылөны. Аддзан, кутшөм налы долыд.

Корсюрө вөр кыскалан туй бокысь кыпөдчывлісны повзьём съөлаяс, тарьяс, байдөгьяс. Петыр

сувтѳодас вѳлі вѳвсѳ да дыр видзѳодас пѳткаяс лѳбѳм бѳрся.

— Меным кѳ эськѳ татшѳм бордъяссѳ. И мыйла мортыд оз вермы лѳбавны?— заводитас гѳлчитны сійѳ.

— Мый нѳ, Петрован, бордъяснас кутан вѳчны?— юаси ме.

— Э-э... Уна-ѳ ми аддзылім паськыд мусѳ? Вѳлі кѳ бордъяс, лѳбзылы эськѳ гырысь каръясѳ, саридзяс сайѳ, видзѳдлі, кѳні мый вѳчсьѳ, мыйсяма йѳз олѳны, кутшѳм зверь-пѳткаяс эмѳсь сѳні.

Петырлѳн шань вѳлі сьѳлѳмыс. Кер тыра додьясѳн вѳвьяс ѳдва кайлісны ѳти джуджыд кыр. Кутчыяс сійѳ додь нырас да тшѳтш отсалѳ вѳвлы. Весиг он тѳд, кодыс ѳнджыка кыскѳны: вѳлыс либѳ Петыр. Некор ме сылысь эг кывлы сѳткѳм либѳ лѳк кывьясѳн видчѳм. Этша сѳрнитліс, но шуас кѳ нин мыйкѳ, дыр он вунѳд кывьяссѳ.

Зѳв ясыда помнита татшѳмтор. ѳти тѳвся лунѳ ѳльѳксан дядь пѳрѳдіс зѳв кыз коз пу. Ми Петыркѳд сулалім бокинджык. Ыджыд шумѳн шлопкысиспѳрис сьѳкыд пу, пыдѳдз вѳйи лым пытшкас. Муѳ кучкысигѳн коз дорысь торъялі кутшѳмкѳ гѳгрѳс шар да тюрыштис коркаасьѳм лым кузяяс. И сійѳ шар письыс ѳти бѳрся мѳд петисны посныдик лѳбачьяс. Найѳ эз на вермыны лѳбавны, йѳжгыльтчисны ѳти чукѳрѳ, оз тѳдны кытчѳ пышійыны. Петыр уськѳдчис лѳбачьяс дінѳ, пуктис найѳс ки пыдѳс вылас да корис ас дїнас менѳ.

— Лѳктор артмис, друганѳй. Козьяс вѳлѳма уркайлѳн позйыс. Мый нѳ ѳні накѳд лоѳ? Нолтѳ ѳдйѳджык мыччы позсѳ, кынмасны коньѳрьяс.— А ачыс шѳпкѳдѳ лѳбачьяслы.— Эн полѳй, эн полѳй, немтор ог вѳч.

Ме мыччи лым вылын куйлысь шар кодь тѳгрѳс

позсö, ачым пыр на ог эскы лоöмторйыслы. Видзöда Петыр вылö да дивуйтча. Первойысь аддза, медым тöлын кутшöмкö лэбач быдтис ассьыс пиянсö.

Петыр уркай пиянöс бөр пукталис позъяс, ачыс дзоргис-видзöдис орчча пуяс вылö.

Нель уркайпи пукалисны шоныд позйын, йöжгыльтчöмаöсь, полöны. Миянсянь зэв матын кутисны лэбавны кык уркай, тыдалö, пияннысö корсьöны.

— Танöсь, танöсь пиянныд!— горзи ме.

Петыр лэптылис кияссö вывлань, быттьö кöсийс петкöдлыны найöс, сэсся позсö пуктис ас судтаыс кымын сук коз вылö.

— Эн гажтöмчöй, бура олöй. Мамныд аддзас, оз эновт тiанöс.— Петыр нетшкис пöрöм козйысь шапка тырыс кольяс да пуктис лым вылö, медым аддзасны уркайяс.

— Петрован, мыйла нö уркайыс тöвнас быдтысьö, оз öмöй пов кöдзыдъяссьыс?— катище вылö лэччигөн нин юаси ме.

— Быд лэбачлөн аслас олöм,— вочавидзис Петыр.— Тöвнад кольясыс восьтöны ассьыныс жыръяссö, быдтысьысь уркайлы кокныдджык сэтысь перйыны кöйдысьяссö. А кынмöмысь сийö оз пов. Позсö вöчö шоныда, гөнъясөн вевттьö пиянсö, мамыс унджык кадсö пукалö позъяс, а сёянсö ваялö батыс.

Ме эска и ог эскы, но Петыр, аддза синъяс сертиыс, оз шмонит, висьталö сьölöмсянныс.

— А мыйла нö эськö уркай пияныс абу гөрба ныраöсь?— водзö юаси ме.

— Öнi найö дась нянь на сёйöны, бать-мамыс вердöны. Быдмыштасны — лэбавны кутасны, и сэки вöлисти вежсяс нырыс. Гөрба нырнад налы лöсьыдджык кольястö киллыны.

Дыр на ас кежын дивуйтчи Петыр вылö. «Унатор жö сийö тöдö. Ме кö эськö вöли сэтшöм».

Петыр быттьö гөгөрвоёма менсьым думъясöс, шоныда видзöдліс да шуис:

— Вот кутан велöдчыны водзö,— ок, унатор тöдмалан.

## ПÖРЫСЬ ПОЖÖМ

Вöрса изöрмöм туй бокын, коді тöдас кымын во нин, сулалö ыджыд да кыз пожöм. Кымын арöс сылы, некод оз тöд. Сійöс адзылісны миян пöльяс и батъяс.

Ылöдз тыдалö шочиник вожъяса пу. Матігөгöрса козъяс да кызъяс сы дінын кажитчöны карликъясөн. Кокыс пожöмлөн сэтшöм кыз, медся кузь кияса мортлы не сывъявны сійöс. Тырмылöма тай, майбырлы, выныс! Чатыртчылан кө сы вылö, юрсьыд шапкаыд усö.

Вöліны кө сылөн синъяс, ылöдз эськö вермис видзöдны. Быттьö стөрöж, сулалö да видзö пармаыслысь чöвлунсö. Тайö пу дорас тшöкыда пуксьывлöны шойччыны вотчысьяс, вөрö волысьяс. Быд пöрйö, кор тайö местаас веськавла, пуксьывла сы дорö и ме. Малалышта киясөн коксö, нюмъёвта: «Номый? Кутшöма олан-вылан?»

Унаысь казавлі, кызди пожöм вылö пуксяс гöрд чышъяна сизь да ён нырнас пыр клёнгас чöv олысь пу кузя. Кор пуыс ён да том вöлі, тöдöмысь, сизьлы тані немтор вöлі вöчнысö. Тайöс, буракö, гөгөрвоё пöрысь пожöм и оз дöзмы вöрса лэбач вылö. Колöкö, сизьыс думнас көсйö нэм помсö нюжöдны пуыслысь, висьöмысь сійöс видзны, сы пытшкö дзёбсьöм

пучойяссö бырöдö, медым пожöм сьöлöмöдз найö эз  
вермыны пырны.

Мелі шонді лыдтöм-тшöттöмысь киясьліс да чо-  
лöмавліс вöрса быдтасöс. Шоныд гожся зэръяс  
мыськавлісны сылысь ки-коксö, небыд лым чиръяс  
пуксьывлісны сы вылö шойччыны. Вöрса гулюяс и  
сьöла-таръяс гажöдлісны сійöс.

Кор пожöмыс вöлі томджык, сы кудриясын быд  
ар öшавлісны сирöд кольяс. Тэрыб вöраса уръяс да  
гöрба ныра уркайяс вель тшöкыда чöсмасьлісны  
вöрса кöзьяйка ордын. Некодöс пуыс эз вомавлы ни  
чирыштлы. Быдöнлы кöсйис вöчны буртор. Аслас  
кузь нэмөн вель уна кöйдыс сійö кояліс ас гөгöрыс,  
медым мукöдъяслы сетны олöм.

И со öні пöч кодь пöрысь пожöм бокын быдмö-  
ны вöсньыдик пожöмьяс. Том пуяс тöладжык лунъ-  
ясö челядьяс моз дöзмöдчöны öта-мöдныслы.

Коркö, дерт, дзикöдз слабитас уна вояс чöж су-  
лалысь пожöм, вермас сійöс пöрöдны и вына тöv.  
Но том пожöмьяс сы моз жö кутасны гажöдны тайö  
туй кузьяс ветлысь-мунысьясöс. Сьывны налы  
аслыссяма сьыланкывъяс, быдöнлы козьнавны  
дзоньвидзалун да вöрса чöскыд кöр.

Сідзкö, эз весьшөрö ов пöрысь пожöм.

## ВÖРАЛЫСЬ ДА ГЕОЛОГЪЯС

Поводьяс öдтöм пывсян кодь: оз шонты, оз  
гажöд. То векуштчöм кымөръяс коялыштасны му  
вылö кöдзыд зэр войтъяс, то дрöчка кодь лэчыд тöv  
заводитлас горзыны лэк гөлöсөн.

Корсюрё опөстлас ю пөлөн нюжөдчөм парма, и пырысьтөм-пыр мөдас кокныыдасыны да ыръянитчыны арся зэръясысь ойдөм Печора. Бордтөм рака моз чеччалөны да песласьöны веж гыяс, быттё скөрмөмаөсь мыйыськө, инас оз öшйыны.

Вөралысь Педөр дядь, нейджыд тушаа, дженьы-дик уска олөма морт, пукаліс вөр керкаын да медся мисьтөм кывъяснас видіс ышмысь поводдясө. Мөдөд лун сійö эз петав пармаө, пукаліс вөр пөвстө дзесьём «дворечын», кызди радейтліс шуны ассьыс оланінсө вөралысь, да виччысис енэжыслысь бурасьём. Гажтөм сьөлөм вылас. А зэр кисьтö и кисьтö.

Гажтөмчö и Педөрлөн понйыс — сувтса пельяса, крукыля бөжа, смоль сьөд гөна Лыско. Пон пуктылас нырсö öдзөс дорö, кывзыштас, мый вөчсьö ывлаас, и гажтөма видзөдлас көзяин вылө.

Педөр гөгөрвоис понйыслысь тажтөмчөмсö, малыштіс сійöс шылыыд гөн кузяыс да надзöникөн шуыштіс:

— Омöль миян делöясным, другö. Таво көсйысим кык норма тыртны, йöз водзын кыв сетім, а вежон чөжөн зэв на этша вайим прöмыстö. Аддзан öд, ывлаас мый вөчсьö, сөкъя тшакыд. Абу гэ мыжа.

Дыр на варовитіс вөралысь аслас нель кока другыскөд, кодкөд быд ар кытшлавліс пармаяс, юкліс мудзсö да сьökыдлунсö. Тэрыб кокъяса, төлка Лыско лунтыр тшыныйысяс-рисьялас, а зверь-пөтка-тө корсяс. Эз öтчыд мездыв сійö и ассьыс көзяинсö, кор виччысьтөг налы паныдасьлісны ош либö лэчыд гыжъяса вөркань. Не Лыскоыс кө, колөкө, Педөр эз öнйя моз нимав вөралысьяс пөвстын: уна небыд зарни кыйöмысь кольөм во орден öшөдісны морөс вылас.

Көть и эз вөв кокни шедөдны татшөм славасө, но Педөр дядь эз элясь аслас удж вылө. Дас нель арөса детинкаөн сійө босьтис первойсыь киас пищаль. Таво нелямынөд ар петис прөмышляйтны. Вөралысьясөн вөліны и сылөн дедыс да батысь.

Лыско кодзыд нырнас тувкнитис көзьяиныслы пидзөсас, гоз-мөдысь өвтыштіс бөжнас, быттё көс-йис юавны: «Дыр-ө нө тані кутам куткырвидзны?» Сэсья котөртис өдзөс дорө, чошнитис пельсө да заводитис гораа увтчыны.

«Оз-ө нин кодкө лок?» — мөвпыштіс вөралысь да гурйив восьтис керка өдзөссө. Печора берег пөлөн восьлалісны кык мужичөй да нывбаба. Мыйкө дыра мысти найө ставөн веськөдчисны керкалань.

— Лэдз шойччыштны, вөрса олысь, — ылісянь на шыасис тошка морт, коді восьлаліс медся водзын.

— Милости прошу, — рочалыштіс Педөр да горөдіс пон вылас, коді скөра увтіс төдтөм йөзөс.

— Мыйсяма йөз? Кытчө туй кутад? — керкаын нин юаліс көзьяин да съөд синъяснас видзөдліс быд-өн вылө торйөн.

— Геологъяс ми, батя. Кывлін сэтшөм йөз йив-сьыс? Тасянь матын уджалам, — вочавидзис нывбаба, кодлы позьө вөлі сетны ар нелямын. — Ой, кутшөм тані шоньд, вокъяс! Но мый, абу рад, көзьяин?

Пач вылас Педөр пуктіс шьд тыра котёлок, съөдасьөм ыджьд чайник, сэсья бара видзөдліс гөстьяс вылө да дивуйтчөм пырысь заводитис:

— Первойсыь на аддза тайө местаяссьыс геологъясөс. Сө збыль. Некор на эт паныдасьлы.

— Вот и аддзысим. Коймөд төлысь ми танөсь. Регьд бөр мунам, — тэрыба сёрнитис тошка геолог.

— Сідзкө, регьд менө вөтланьд татысь? — ышловзис Педөр дядь.



— Мыйла вѳтлам? Кыйсыы на здравье. Тѳрам, пармаыс паськыд,— дженьыдик куртка вывсыс вѳснъыдик чуньяснас заводитѳ разявны кизьяссѳ нывбаба.

Съѳкыд вѳлі гѳгѳрвоны, мый йылысь думайтѳ вѳралысь. Быдѳн пѳрччысисны, пуксялісны матѳджык пач дорѳ, кѳні оналіс шоныдыс.

— Он тай полѳй татшѳм поводдянас ветлѳдлыны, кѳтасьѳмыдѳсь медбѳръя сунисѳдзыс,— геологъяскѳд варовитѳ вѳралысь да паськѳмъяссѳ налысь ѳшліс сѳр вылѳ. «Налѳн абу жѳ нин олѳм. Гѳжѳмбыд и арнас уялѳны нюръясѳд, пармаясѳд. Номйыд, лѳддзыд вильѳдѳ. Кынмалѳмыд, кѳтасьлѳмыд сюрсьѳ. И семья, тѳдѳмысь, быдѳнлѳн эм»,— думнас жалитыштѳс геологъясѳс вѳралысь.

Сѳсся Педѳр пуктѳс пѳвъясысь тувъялѳм пызан вылѳ тар шыд тыра котѳлок да корис гѳстьясѳс нуръясьыштны да юыштны чай. Геологъясѳс ѳна тшѳктыны эз ковмы, перйисны мешѳкъяссьыс кѳрт кружкаяс, паньяс, пуксялісны пызан гѳгѳр и пыр жѳ заводитѳсны азыма сѳйны. Панясьѳны да гѳлчитѳны. Педѳр дядь видзѳдѳ нывбаба вылѳ да шензьѳ: «Нывбабасѳ мыйла нин босьтѳмаѳсь аскѳдныс? Делѳ ѳд сылы, сьѳд вѳртйыд уявныд. Колѳкѳ, тортас челядь коли. Абу тайѳ бабйѳй удж».

Кор мужикъяс куритѳсны нин мѳдѳд папирѳсѳн, Педѳр дядь юалис налысь:

— Сѳсся нѳ, шань войтыр, мый, думсьыд, корьянныд менам кыйсянінъяссьыс, быттьѳ позьѳ кѳ висьтавны?

— О, Войвылыд ѳд озыр! Быдторйыс танѳ эм: из шом, нефть, газ... Унатор нин аддзисны, но унатор йылысь на и огѳ тѳдѳй,— заводитѳс байтны том геолог, кодѳ ѳнѳдз сѳрнийѳ эз на шыасьлы.— Вот и

колö тöдмавны выль местаяс, аддзыны выль озыр-  
лунъяс.

Педөр дядь вöралігад шоча паныдасьлывлö йöз-  
ыдкөд, гажыс бырöма, да и окота варовитыштны.  
Юасьö и юасьö.

— Чайтад, и тайö местаяссьыс мыйкö сюрö?

— Коді корсьö, батя, пыр аддзö,— нюмъёвтіс  
нывбаба да видзöдліс ывлаö.

Поводдяыс пыр на лёкаліс. Абу на мудзöма  
тöлыс, омлялö, мурзö. Зэр то öддзылас, то лань-  
тыштлас.

Вöралысь кывзіс геологъяслысь сёрнисö и дум-  
нас нимкодясис аслас чужан муөн. «Айда, Коми  
му, быдлаын кутісны тöдны миян йылысь. Эг чайт-  
лы, и ставыс! Колökö, некымын во мысти менам  
вөр керка местаын кутасны стрöитны посёлок либö  
выль кар. Быдторйыс вермас лоны öнiя каднад».

Геологъяс тэрмасисны асланыс базаö, көть и  
Педөр дядьлы зэв на окота вöлі пукыштны öтлаын  
шонид керкаын.

— Мöдысь на кежавлöй ме ордö, онö кө, быттö,  
регыд мунöй,— корис көзяин.

— Волам, волам, тэ ордын сэтшöм лöсьыд,—  
вашъяліс нывбаба.

Мунісны гöстьяс, но Педөр дядь ас кежас кутіс  
жалитны кыйсян местаяссьö, кодъяскöд сылөн йит-  
чöма уна казътылöм. Тайö геологъяс мозыс жö сійö  
уна вежонъяс чöж ветлöдліс парма кузъята, корсис  
небыд зарни. Öнi сійö эз нин вермы пукавны вөр  
керкаын да виччысьны поводдяыслысь бурмöмсö.

Педөр дядь видзöдліс часі вылö, сэсся шыасис  
Лыско дінас:

— Гашкö, петалам пармаас пальöдчыны, дыр-ö  
позьö ружтыны, Лыско?

Лыско быттьö тайöс и виччысьöма. Заводитіс öвтчыны бöжнас, чеччавны кöзяиныслы морöсас. А вöралысь салдатскöй шынельсьыс вурöм тужурка вылас пасьталіс нин лаз, босьтіс пицаль да чер и мөдöдчис пармаö. Понйыс котöртіс водзвылас.

## ВИЗУТÖНЫ НИМТÖМ ШОРЪЯС

Емваль юö усьö ичöтик шор. Дыр сылы лöб писькöдчыны татчöдз. Унаысь сійö зурасьлас пöрöм пуясö, вель тшöкыда вежлас мунан туйсö. Кор во-ас Емваль дорöдз, нейджыд визув ю пыр и шымыртас сійöс, аслас кабыръяс улö босьтас. Сэсся мөдас аскöдыс нуны водзö, весиг шорысь петöм ваыслысь оз юав, мыйла да кытчö нуö сійöс. Нуö и ставыс. Сідз быттьö и колö.

Öдйö тай кольöны вояс. Варччöм кокъяса, ситеч дөрöмъяса детинкаяс, ми быттьö дзик на неважөн воливлім гожея лунъясö тайö тöдса шор дорас. Вугравлім сэтысь зарни бордъяса шниткиясöс, чунь кузя налимъясöс, сэсся и найöс жаритлім бипур вылын. Ас кыйöм черилөн чöскыд кöрыс öні на кылö вомын. Нянь пыдди азыма сейлім шомкор — шома, но чöскыд. Шорыс кывлывліс миянлысь серам-гажöдчöм, мича сыланкывъяс и чуксасьöмъяс.

Ставыс тайö вöлöма мойдын моз. Кадыс сэсянь удитіс визувтны шор мозыс жö зэв ылöдз.

Емвальсянь неылын öні нюжöдчöма көрт туй, коді муно Сыктывкарсянь Микунь карöдз. Воськыд-вылас, көні ми вотливлім чöдлач да ыжнёнён краситливлім сера бедьяс, кыптисны лесопромышлен-

нӱй комплекслӱн корпусъяс, уличаяс пӱлӱн трым-видзӱны мичаысь-мича олан керкаяс. Лунысь-лун паськалӱ том Эжва кар.

Унатор вежсис танӱ бӱръя воясас. А шор пыр на важкодъ, абу вежсьӱма ни пӱрысьмӱма. Уджалӱ, отсасьӱ Емваль юлы, олӱ быд лунъя олӱмӱн. Кузь, тыдалӱ, сылӱн нӱмыс. Тулыснас сӱдзи жӱ ойдрӱ — паськавлӱ. Гожея шоньд лунъясӱ сӱнӱ важ моз сялькӱдчӱны зарни бордъяса шниткияс да тӱрыба котралӱны берег пӱлӱныс вӱсни кокъяса истанъяс.

Татшӱм шоръяссӱ вель унаӱс позьӱ аддзывны Емваль ю пӱлӱн. Эз кӱ вӱвны татшӱм вӱрса посны-дик шоръясыс, гашкӱ, эз и сӱтшӱм долыда овсы Емваль юлы. Ӳд татшӱм отсасьысьясыс и буретш сетӱны сылы вын-ӱбӱс. Юкталӱны сӱйӱс водз тулыс-сянь сӱр арӱдз, муяс кынмытӱдз, кытчӱдз сир ка-быра кӱдзыдыс оз дор шоръяссӱ.

Кӱть и посниӱсь да нимтӱмӱсь татшӱм шоръяс-ыс, но найӱ вӱчӱны уна буртор. Мырсьӱны-пессьӱны лун и вой, праздникъяс ни шойччан лунъяс оз тӱд-лыны. Юкталӱны на гӱгӱрын быдмысь пуясӱс, сетӱны асьыныс васӱ дзоридзъяслы, лӱбачъяслы, зверь-яслы. Видзӱны, медым парма-ягъясын эз пась-кав горш пӱжар. А кымын вӱралысьӱс, вотчысьӱс да шойччысьӱс юкталаньд тӱ, нимтӱм шоръяс, гожея да арся лунъясӱ асланыд чӱскыд кӱдзыд ва-над! Лыддяс ӱмӱй кодкӱ тайӱс!

Тӱянӱс позьӱ ӱткодявны зӱль йӱзкӱд, кодъяс лишнӱй горзытӱг вӱчӱны ыджыд да колана удж: вердӱны да шонтӱны мукӱдъясӱс.

Со мый вӱсна и ми радейтам тӱянӱс, нимтӱм-вичтӱм посныдик шоръяс. Мый нӱ, онӱ кӱ ылӱдз нималӱй, мед, оз кӱ быдлаын тӱдны тӱянӱс. Но энӱ кӱ вӱлӱй тӱ, эз эськӱ лоны и мукӱд юясыс.

## МЫЙЛА КӨЧЛӨН КЫК ПӨЛӨС НАСЬКӨМ

Школаысь локтөм бөрын кык друг Виктор да Митя пуксисны рисуйтчыны.

— Мый нө эськө рисуйтан?— юалис Виктор.

— Ракета,— вочавидзис другыс.

— Оз артмы. Ме видлі нин. Гашкө, көчөс рисуйтам?

— Көчөс кө и көчөс. Видзөдлам, коднымлөн мичаджык артмас.

Дыр рисуйтчисны. Сэссия заводитисны краситны, старайтчөны, ассыныс уджнысö оз петкөдлыны öта-мөдныслы.

— Менам эштис. Со кутшөм мича лои,— ошйысис Митя.

— Менам абу жө тэысь мисьтөмджык.

— Вот и менам,— эз сетчы Митя.

— Эн ошйысь. Та кузя өмөй көчылдөн пельыс овлө. Тожө мем художник.

— А тэнад көчылд синтөм,— дөзмөдис другсö Митя.— Ой, кула серамысла... Синтөм көч! Ха-ха-ха.

Дыр на, колөкө, зыксисны детинкаяс, но сэки буретш пырис керкаө Викторлөн чойыс Галина, коді велөдчө учительницаө.

— Галя, менам өд көчыс мичаджык,— бумага листсö чойыслы мыччис Виктор.

— И менсьым на видзөдлы,— шыясис Митя.

Галя видзөдліс öти картина вылас, синсö вештыліс мөд вылас.

— Кыкнанныд бура рисуйтөмыдөсь. Виктор, а мыйла тэ көчсö краситөмыд еджыд краскаөн? Öні жө тулыс. И көчылд важөн руд паськөм вежис.

— Ещө ошйысин,— тувкнитис бокас другыслы Митя.

— Көчүд өд еджыд овлө. Ме и ачым музейысы аддзылі. Ветлам көть да видзөдлам.

— Да, көч овлө и еджыд. Сөмын төвнас. Еджыд паськөмнад лым вылын сійөс онджык казав,— водзө висьталіс Галя.— А тулыснас, кор мөдас сывны лымйыс, көчлөн гөныс вежсьө, лоө руд. Тайө бара жө сы вөсна, медым омөльдзыка тыдаліс йөзлы, зверьяслы. Еджыд паськөмнад эськө кутшөм ылісянь казалисны сійөс.

Тулыснад вежөны ассыныс гөнсө и урьяс, сьөдбөжъяс да уна мукөд зверьяс.

## МЕДВОДЦА ЛЫМ

Арыс мыйкө дыра чөв оліс. Вөлі шань да мича. Сетіс кад йөзлы идравны муяс вылысь став урожай, лэдзис чукөртны тшак да вотөсьяс. Петкөдліс ассьыс мичлунсө вөр-ва радейтысьяслы.

Сэсся поводьяыс вочасөн лөкмис. То луньясыс көдзыдөсь, то вежон чөж помыв в зэрас. Вына төв корья пуяс вылысь чашйис став мичлунсө. Ойдісны юяс да шорьяс. Көдзыдыс вөтліс шоньд муясө лөбачьясөс, нярзөдіс ывлаын быдмысь быд сикас дзоридзьясөс.

«Өні позьө и шойччыштны,— думайтө ар.— Эбөсөй дзикөдз быри».

А төв тайөс и виччысис. Окота сылы ассьыс вынсө да мичлунсө петкөдлыны. Муртса мудзөм ар лөньыштіс, кунис син пөвсө, төв мөдөдіс зумыш кымөрьяслы юөр: «Войнас заводитам уджавны. Тырмымөн дасьтөй лым. Арөс колө повзөдны».

Сьодасьом му вылө кымөръяс войбыд кояліснылым. Керка вевтъяс, лыска пуяс, москияс, муяс да видзьяс лоины еджыдось.

Төвлы рад, ыджыд гөлөсөн горзө кымөръяслы: «Ещө содтыштөй, мед гөгөр вөлі еджыд да сөстөм. И юяслысь вомнысө тупкөй!»

Кынмыны кутіс шойччыны водөм ар. Восьтіс син пөвсө. Скөрмис төв вылө, кутіс кевмысьнышонділы: «Муса шондіөй, пикө вои, еджыд тошка төв менө зырө. Мездыв на, сьөлөмшөр».

Шонділы жаль на лои арыс. Писькөдчис кымөръяс пөвстөд, му вылө кутіс коявны асьыс югөръяссө. Медводдзаысь усьлөм лым час-мөдөн и бөр сылі.

## В Ö Р К А Н Ь

Лун шөр гөгөр арся поводдяыс дзикөдз йөймис. То мурзыштас, кытчөдз тырмас выныс, то грөзитчыштас өшинь тасьясө, чашнитлас кальквидзысь өдзөсьяс. Бырө выныс и кутас сьөкыда пошиктыны, сөсся шөгө усьлө, мөдас бөрдны сьөд синваөн.

Важөнкөдь нин пемдіс. Ланьтісны асланыс шоньд позйын чипаньяс. Вожа пеля кань Марпида кайис паччөр серөгө да крукыльтчөмөн водіс. Мыйкө дыра сійө кургыштіс, сөсся дзикөдз ланьтіс.

«Тотш... тотш... тотш...» — сьыліс стенин мудзлытөм часі.

— Эз тай нө во батьө, көні нө сы дырасө ветлө? — эшкын увсянь шыасис Поля мамыс дінө, коді,

гашкё, дасысь нин петалис ывлаё. Воча кыв пыдди мамыс сёмын ышловзис.

Полялөн батыс асывнас на муніс вөрө пес кевраны. Сьорсьыс босьтис и пицаль. Көзяин бөрсяыс вётчисны ягё и кыкнан понйыс: Полкан да Тузик. Важөн нин колі воны, а найё абуось и абуось.

«Гашкё, көинъяс батьё вылө уськөдчисны,— майшасис Поля да гусьоникөн кыйкнитливліс мамыс вылө.— Но батьё жё пицала, и понъясыс сыкөд». Бурөдіс асьсё нывка.

Мамыс пыр на чөв оліс, сёмын корсюрё видзөдывлө өшиньөд да кывзысьё ывласянь воём быдшыё. Мөд пөрийё нин сійё шонтіс ёсь зобъя югыд самөвар, а виччысянторъясыс пыр абуось.

— Көлөкө, бабё ордё пырис. Шонтысьны. Татшөм поводдянад, дерт, кынмис и көтасис,— выльысь бурөдыштис сійё мамсө.

— Узь. Воас, гашкө...

Узьясяс өмөй, кор Полялы юрас волісны на шуштөмысь-шуштөм думъяс.

И сэки нем виччысьтөг посводзын кыліс Полканлөн да Тузиклөн увтчөмыс. Эз на удит нывка петны эшкын увсьыс, мамыс уськөдчис нин локтысьяслы паныд.

Медводзын керкаё чепөсйисны понъяс. Найё өтпырийё моз матыстчисны крөватын куйлысь Поля дорё и нюлыштисны сылысь кисё, быттьө көсйисны шуны: «Прөста и мамыдкөд шогсид, ми со гортынёсь».

Сэссия пырисны батыс да мамыс. Батыс гөрдөдөма, пөсялөма. Поля коксё өшөдөмөн пукаліс крөвать вылын, эз төд мый вөчны: чеччыны либө бөрводны.

— Төдан, мый батыд вайис?— юалис мамыс.

— Көч гөснеч,— ньөти думайттөг вочавидзис

Поля. Батыс сылы унаысь нин вайлывліс вöрысь то выя нянь, то кампет, то преник. Кöч пö тайö тöс-нечсö мöдöдіс.

— Рысьöс батыд кыйöма. Сійөн и сы дыра ветліс, а ми тані майшасям,— вочавидзис мамыс.

Полина кöмтöгыс матыстчис пызан дорö, гөгөр-вотöма видзöдліс батыс вылö.

— Мыйсяма «Рысь»?

— Зверь сэтшöм эм, рочөн кö шуны, «Рысь», а миян ног вөркань. Вот ме сійöс и кыйи. Тузик да Полкан зверсö пу йылö йөршитöмаöсь,— висьталіс батыс.

— Кöні нö эськö сійö, петкөдлы,— корис Поля.

Недыр мысти батыс пыртіс посводзысь зверöс. Поля быдсөн повзёмысла чилöстис.

— Эн пов, öні нинöм нин оз вöч,— бурöдіс нывсö мамыс.

Кань звиркнитіс-чеччыштіс пач вылысь, матыстчис порог дорын куйлысь зверь дорö да чушкыштіс быдөн, мышку вывсьыс гөнъясыс кыптисны.

Поля первой ылісянь видзöдіс вөркань вылö, сэсся локтіс матöджык.

— Эн и повзы?— юаліс Поля батыслысь, сэсся ичöтик кияснас полігтыр малыштіс вөрканьöс.— Ой, гöныс кутшöм небыд, а гыжъясыс сэтшöм лэчыдöсь.

Зверыс и збыльысь зэв ёна муніс кань вылö, сöмын ыджыд, тушаыс метр кузя лоö. Бöжыс дженъыдик, кодкö быттö ордöма сійöс. Кокъясыс кызöсь, кузьöсь. Гöныс зэв сук да небыд. Туша кузяыс тыдалöны гырысь гөрдоват чутъяс, кынöм улыс да кок бокъясыс еджговатöсь, кодкö быттö дöмас сэтчö вурыштöма.

И чужöмыс каньлөн кодь гөгрöс. Ныр помыс



сьод, синъясыс петыштöмаось водзлань, щöка гö-  
гöрыс чурвидзöны шочиник усьяс.

Тайö рытнас унатор висьталіс зверь йылысь  
Полялы батъяс. Олö пö вөркань ылі вөръясын, пыр-  
джык кутчысьö öтнас, тадзнад кокныдджык корсь-  
ны сёян.

Сан моз жö сійö кыйсьö войяснас. Каяс кутшöм-  
кö пу вылö, дзёбсьяс сэтчö да мöдас кыйöдчыны.  
Кор матігöгöрын мыччыяс асьыс омöльджык  
зверь, вөркань виччысьтöг чеччыштас пу вылысь,  
лэчыд пиньяснас да гыжъяснас öти здукöн и пöкö-  
ритас кыйöданторсö. Йöра пиянös весиг вермö  
кутны. Лёк поводдя дырйи вөркань кыйсьö и лун-  
нас. Куталö лым пиö дзёбсьöм сьöлаясös да таръяс-  
ös, кыйöдö шойччысь көчьясös.

Мортысь да понъясысь, дерт, полö, зільö öдйö-  
джык пышйыны, а йөршитасны кө, лэчыд гыжъяс  
отсöгнас пыр и каяс пу йылö.

Энь вөркань быд во чужтö кык-куим пи. Пияныс  
чужöны посниös, синтöмös. Мамыс найös вель кузь  
кад вердö аслас йөлөн, сёсся, кор нин лоöны ыджыд-  
джыкös, кутас велöдны кыйсьыны.

Поля, колökö, дыр на кывзис батъяслысь висьта-  
лöмсö, да мамыс ыстис узьны.

## ПАНЬÖ ГРЕЗДЫН

— Вай Паньö грездö кыссьылам,— кызкö öти  
арся лунö кутис нуöдны менö тöдса вöралысь.

— Грездад нö мыйсяма вöралöм?

— Э-э-э, эн шу тадзи... Волан кө сійö местаясас,

нэмтө кутан казътывны. Съолаыс да тарыс сәні...  
Ух! Пищаль ствол помад пуксъывлөны. А места-  
ясыс... Швейцарияысь сәтшөмсө он аддзы.

— Тә өмөй волін Швейцарияас?

— Телевизор пыр аддзылі. Кайлам, он кут  
элясьны.

Ме көть төді, мый кыйсян ёртөй пырджык ош-  
йысьө, но петитчыны эг вермы.

Сулаліс мича поводдя, кутшөм шоча овлө вой-  
вылын гожөм помасьөм бөрын.

Мөд луннас ми вөлім нин Вылыс Човйын. Петім  
лежнёвка вылө да кутім виччысьны машина.

— Гөлөсуйтам.

Эг на удитөй ләптыны кияснымөс, шофёр сувтө-  
діс машина да мыччис кабинасянь важөн нин брит-  
лытөм чужөмсө.

— Но, кок песысьяс, пуксъөй, шелөда, кытчө  
колө.

Пуксим шофёркөд орччөн, и машина төвзис  
водзө лежнёвка кузя. Туй пөлөн миянлы паныд тә-  
рыба котөртисны кушмөм местаяс, кытысь став  
вөрсө джыбөдөмаөсь нин вөр лэдзысьяс.

Өдйө и воим Кокульө. Подөн кө эськө, сьөкыд  
мешөкнад да пищальнад лунтыр ковмис шлөпикты-  
ны, унаысь чышкавны чужөмсьыд пөсьтө.

Кокуль весьтөд, потшъяс кузя, кодъясөс нюжө-  
дөмаөсь Чов ю вомөн, вуджим мөдар берегас. Сэсса  
кыпөдчим джуджыд кыр йылө, кытісянь ылөдз ты-  
даліс пармаыслөн шылыыд мышкыс, паськыд отыс.

Помасис куш места, и ми петім векныдык туй  
вылө, коді веськыд визьөн вундіс пармасө. Местаяс-  
ыс тані и збыльысь лөсьыдөсь, гажайсь. Эз прөста  
ошйысь друганй. Ылөдз нюжөдчөма кос яг. Завод-  
скөй трубаяс кодь веськыд да кузь пожөмьяс, пи-  
пуяс да кыдзыяс сулалөны өта-мөд бердас топөдчө-

мөн. Паськыд шляпаа гөрд тобъяс, нитш пиё дзебсьом путникъяс сярвидзисны дзик туй бокас. Арся зэръясөн мыссьөдөм пув розъяс, польдчөм чөд тусъяс, уна вожъяса көчвөнъяс мичмөдисны чөв олысь ягсө.

Вель дыр нин мунім ми. Синъяс водзын вежласисны выльысь-выль серпасъяс. То нейджыд шор паныдалас миянөс, то воласны кушмөм юра діяс. И сьөла-тарыд эм, вель унаөс удитім повзьөдны.

Сэсся мыччисисны видзьяс. Тыдовтчис медводдза турун зорөд. Шуйгавылын, вөр бердас топөдчөмөн, сулаліс ичөтик пивсян. Вөрас мунө и важиник лежнөвка, кодлөн керъясыс удитөмаөсь нин сисьмыны, крөшитчыны.

Вөр ді сайысь мыччисис керка. Позьö на овны сәні: өшина и пача.

— Вот ми и Паньö грездынөсь,— керкалань кежис ёртöй.— Шойчыштам да ветлам Оболтус ю дорö сьöла лыйлыны.

Неылын тыдаліс мөд, ваджык керка. Стенъясыс сьөдасьөмаөсь, ветт вылас заводитөма быдмыны нитш. Важөн, тыдалө, сійөс стрөитлөмаөсь. Но и сәні позьö узьны-шойччыны вой тальялысь мортлы. Нар весиг эм. Тыдалө, кодкө да кодкө пыр татчө сувтлө коллявны арся кузь войяссө.

Кыдзи мукөд грездъясын, тані оз кывны йёслөн гөлөсьяс, понъяслөн увтчөмыс, петукъяслөн чуксасьөмыс. Уна вояс сайын тані овлөма аслас семьякөд Паньö нима вөралысь. Ачыс важөн нин оз ветлөдлы му кузя, а нимыс кольөма. Сійөн, вөлөмкө, и шуоны тайö местаяссө Паньö грездөн.

Тайö луннас ми рөмдытөдз уялім Оболтус пөлөн. Ю дорын гырысь чукөръясөн быдмисны сьөд сәтөр кустьяс, кодъяс дінысь өвтис чөскыд дук. Кузь турун мешайтис муны, гартчис кокъяс гөгөр. Паны-

дасьлісны зэв васөд местаяс и тїлля ягъяс, кыті сьөкыд писькөдчыны. Муртса тай ужын вылө вермим жө кыйны кык сьөла. Оз тай, вөлөмкө, пицаль ствол помад пуксьыны найө, сьусьось, тэрыбөсь. Жбыркнитасны и пырысьтөм-пыр дзебсясны, он аддзы.

Паньө грездын узим бура. Кодар бок вылө нюжөдчим, сїдзи и садьмим: небыд турунөн вольсалөм нар вылад лөсьыд!

Сө пасибө сылы, кодї стрөйтлөма тайө керкасө. Курортын моз шойччим. Эз ков туплясьны көнкө бипур дорын.

Та бөрын воссис менам туйөй Паньө грездө. Отпуск кад и быд шойччан лун коллявлї сәні, сәтчөс вөръясын. Унаысь мерайтлі кокъясөн Чов юбокса ордымъяс да туйяс. Быд ар карсянь воливлісны татчө и вотчысьяс. Мукөд воө сы мында пувтані овлө — зырийөн көть курав. И вөлі көні шойччыны: сулалө кык керка, көть кодас пыр да узьмөдчы. Көсьян кө, вежон чөж верман овны.

Кольөм во ме бара волі Паньө грездө. Локті и чуйми. Важ керкаын абу пач ни өшинь, вевтсө весиг ломтөмаөсь. Эз тыдав и выльдзык керкаыс. И сійөс пазйөмаөсь-разьөмаөсь, керъяссө тшын йылө ләптөмаөсь, көть и пескыс вөр тырыс. Дыр сулалі юрөс өщөдөмөн. Төдны эськө, кодї тадзи пакөститчис. Кыптөма тай, кын сьөлөмлөн, киясыс.

Ковмис узьмөдчыны пывсянас. Рытнас сәтчө узьмөдчисны и вотчысьяс. Найө тшөтш видісны да өрисны пакөститчысьясөс. Видісны, кыдзи медся лөк йөзөс.

Во квайт-сизим сайын Чов ю пөлөн сулалісны татшөм жө керкаяс Юркиноын, Миронын. Вөлі юрсюянін и Турын. Вөралысьяс да вотчысьяс пыр вөліны гөстьясөн тайө гажа местаясас.

Өні татысь он аддзы весиг өти керка. Өтиясөс пес вылө лэччөдөмаөсь, мукөдъяссө сотөмаөсь.

Сьөлөмыд доймө, вирыд пузьө, кор аддзан татшөм серпасъяссө. Окота парма пасытаыс горөдны: «Вөрса хулиганъяс! Мый ті вөчид! Кутшөм мам тиянөс чужтіс-быдтіс!»

Гашкө, некор нин оз көсйыны волыны татшөм лөк йөзыс парма-ягъясө, Чов ю бокас. Но локтасны өд мукөдъяс. Вөр-ваыслөн эм уна бур ёрт.

## ДЗОРИДЗАЛӨ СИРЕНЬ

Во вит сайын ме өшинь улө пункті кык сирень куст. Найө өні ыджыдөсь нин. Быд тулыс, мыйөн поводдяыс ёна шондөдас, сирень кустъяс вевтысыясны мича дзоридзьясөн. Пуяс дінсянь өвтө чөскыд дукөн. Ветлысь-мунысыяс частө сувтышглөны керка весьтө, видзөдласны дзоридзьясөн тырөм сирень вылө да нюмъөвтасны. Со кутшөм найө мичаөсь, кутшөм уна радлун вайөны йөзлы.

Водз асывнас да удж помасьөм бөрын ме частө пукавлывла сирень кустъяс дорын. Дыр ог вермы орөдчыны на дінысь, сэтшөм нин найө мичаөсь да кыпыдөсь. Мукөд дырйи пуксяс сэтчө кутшөмкө лэбач да заводитас ливкйөдлыны-сьывны лышкыд гөлөсөн, тыдалө, и найө гөгөрвоөны мичлунсө.

Кысянькө воласны малязіяс. Найө ёсь ныръяснас сатшкысясны дзоридзө, кыскөны сэтысь чөскыд көра соксө, медым сэсса юмов ма сэтысь дасытыны.

Но сиреньлөн мичлуныс тырмө регыд кежлө. Гожөмнас на дзоридзьясыс кутасны кельдөдны,

сэсса вочасөн нярмасны и төв отсөгөн лэбзяласны коді кытчө. Сёр арөдз сирень кустъяс вылын кышөдчасны вижоват коръяс, но сэсса и найө, көдзыд лунъяс заводитчөм бөрын, энөвтасны ассыныс мектаяссө. И сэки пушкыра кустъяс дінысь кутасны чурвидзны съодасыштөм пасьтөм вожъяс. И тадзи найө сулалөны төвбыд, кынмөны, көтасылөны, венласьөны турөбъяскөд. Сөмын тулыснас яр шондыс выльысь бергөдас налы важся мичлунсө: дзоридзьяссө и коръяссө.

Көть төвся кадө сиреньыд и оз вермы ошйысьны аслас мича паськөмөн, век жө сійөс радейтөны... Төдад кодъяс эськө? Каньяс. Да, да, каньяс: Муркаяс, Машкаяс, весиг кыз бөжа сибирскөй каньяс. Пөгибө ме вои наөн. Мыйөн югдыштас, өти бөрся мөд кутасны чукөртчыны сэтчө матигөгөрся керкаясысь каньяс. Первойсө ме ёна дөзмывлі на вылө. Матыстчасны куст дорө, вель дыр нюласны пулысь кырсьсө, сэсса заводитасны йирны. Кыдзи та бөрын он дөзмы кургысь каньяс вылө! Налы колө шыръясөс кутавны, а не пакөститчыны. Кымыныськө вөтывлі жө найөс сирень кустъяс дорысь.

И мый найөс кыскө татчө? Төда, көчьяс радейтөны пипу кырсь, төвъяснас пыр корсьысьөны, кытысь эськө аддзыны татшөм пусө.

А медым каньяс радейтисны чөсмасыны сиреньөн, дивитөй көть энөй, первойысь казялі татшөмторсө.

Сирень кустъяссянь матын сулалөны акацияс, кызъяс, пелысьяс. На вылө рөзбойник каньяс оз и видзөдлыны, чөскыд дука сирень найөс ас дінас кыскө.

Тыдалө, сиреньлөн эм сэтшөмтор, коді төвся кадө ёна колө кань котырлы. Прөста, дерт, найө лун-лун эз эськө бергавны тайө кустъяс дорас.

Сирень йылысь сёрнисö помалігөн содта ещö  
өтигор: медым жö тайö невеста кодь пуыс кутіс  
дзоридзавны быд öшинь улын, карын и сиктын,  
войвылын и лунвылын.

## ВА ВОСЬЯС — СЕЯН ВЕЖСЯС

Кыв-вора кыпыд тулыс! Мый дыра ми виччысим  
тэнö. Сетчис жö тай сэсся тöлыс. Ён на, тыдалö, вö-  
лöмыд, вермин кө венны öш сюръяс кусыньтысь  
кöдзыдсö, нылыштны йисö да лымсö, шыбитны му  
вывсыс сьöкыд шебрассö.

Ва восьём бöрад чери кыйысь местаас оз инась.  
Телепит öдйöджык пуксыны пыжö да бордъя  
лэбач моз шлывгыны ва нылыдсö, пыравны ойдём  
куръяясö, пукыштны лөнь местаясын, тöдса нöрысь-  
ясын.

«Ва восьяс — сёян вежсяс», — висътавсьö йöзкост  
сёрниын. Тайöс унаөн кутöны тöд вылын. Мый көть  
и гудыр да кöдзыд ваыс, нильöг налимъяслы тайö  
кивыв, лун и вой уялöны, корсьöны сёян. Шыбитан  
кö берегсянь некымын вугыр, тöдöмысь, юква вылад  
кыян. Медводдза юкваыд сэтшöм чöскыд, ма вылö  
сійöс он веж. А көні юква, сэні и чай. Чай бöрад,  
гашкö, дум вылад усълö и школаад велöдлём  
кывбур:

Лöсьыд, гажа зэв  
Öні му вылын.  
Долыд сьöлөмлы  
Овны тулысын!

Бадь кустьяс пиын герчкӧ шӧвк голяа горда, чуксалӧ ас дінас пӧвсӧ, гажӧдӧ тувсов ывласӧ. Эрд вывтӧ котралӧ сырчик, ӧвтчӧ кузь бӧжнас, корсьӧ сӕянтор.

Баыс муртса шондӧдыштас да сирьяс кутасны кульмыны. Вой кежлас каясны тыяс да курьяяс помӧдз, мукӧд дырйи ыджыд сирлӧн мышкыс весиг тыдалӧ, быттӧ сера паськӧмнас ошйысьӧ. Песласьӧ, петкӧдлӧ ассыс вынсӧ, повзьӧдлӧ паныд сюрӧм ӕсьясӧс, куталӧ вугралысь гуринаӧс и кельчиӧс.

Миян юясын да тыясын тырысь сирьяс олӧны. Сӧмын шоча найӧ шедлӧны. А шедас кӧ нин — вит во кежлӧ лоӧ сӕрни. Чери кыйысьясыд ӧд пырджык радейтӧны ошйысьны. Ылӧдчысь морт сідз сконйыштас, мый килоа чериыд сыв кузяӧдз быдмас. Эскан он висьталысьыслы — тӕнад сійӧ делӧ. Ва вылад ӧд сӧрсьыд вески ни гираяс он вӧдит. Дерт, медся гырысь сирьясыд пырджык мынлӧны, оз локны сакӧдзыд либӧ пыжӧдзыд. Мыччыласны журнасьӧ, трук-трак вӧчасны бӧжнас, весиг оз висьтасны, мунасны. А тӕныд синва петмӧныд жаль. Быть сӕся лоӧ ошйысьны, гашкӧ, сьӧлӧм вылад кокныдджык лоӧ. Ёдіяс кульмӧны сирьяс серти сӕрӧнджык и пырджык чукӧртчӧны ӧтлаӧ. Удайтчас кӧ адзывны бадь кустьяс дорын налысь польтікасьӧмсӧ, дыр сулалан да видзӧдан на вылӧ.

Кульмигьясӧн чериасӧс оз позь кыйны. Ӧд быдӧн на пиысь лӕдзасны уна сюрс пӧк. Сідзкӧ, чери йӧрданьясыс лоӧны ещӧ на озырджыкӧсь.

Кульмасны чериас — сӕки позяс и донкаястӧ, вугыр шаттӧ кӧтӧдны юясын. Льӧм кӧ кутас дзори-дзавны, чери вӧрзяс. Татшӧм каднад чери кыйысьястӧ сира гезйӧн он кӧртав гортад, корсяс сӧ пӧлӧс помка, а ю вылӧ, дерт, мунас.

Буретш татшом каднас важ тодса меным паныд сюри:

— Друганой, эн на свежой черион номсась?

— Э-э... Онөдз...

Сэсса висьталіс, гырысьось-ө чериясыс вөлөмә-ось. Эска и от эскы, а вомавны абу лөсьыд.

— Көні кыйсин?— водзө юася Петр Ивановичлысь, кодөс варовлун кузяыс унаон нимтөны Быргысь Петырөн.

— Ыб улө ветлім другкөд. Вайи вит налим. Ёді тшөтш шеді, өдва и ләпти, сир кутчысьліс да мыні. Ок и ыджыд, ме сәтшөмсө, сө мокасьт, эг на аддзыв. Ветлам шойччан лунө, он кут каитчыны.

Кызди нө өткажитчан татшөмторйысь! А аслам синъяс водзын сідзи и пеласьөны налимъяс да ёдіяс, кодъясөс кыйөма Быргысь Петыр. И мыйла ме эг ветлы сыкөд тшөтш?

Муртса на дутдіс кывны асфальтируйтөм моски вылын Петырлөн дзуртысь көмыс, аддзи сылысь гөтырсө. Киас сылөн сумка, кытысь тыдалө трескалөн паськыд бөжыс.

— Бур рыт, Кузьминична. Мужикыд сы мында свежой чери вайөма, а треска ньөбөмыд. Гашкө, умин нин ёдісьыд да налимсьыд?

— Жаритмөн на эз вайлы.— Сумкасө босьтіс мөд киас нывбаба.— Ветліс эськө кытчөкө, но мудзыс сөмын шедөма.

Ме вак-вакөн серөкті. Кузьминична скөра видзөдліс, ог-ө сы вылын серав, сэсса мунигмозыс нин содтіс:

— Тайө тэ чери кыйөмнад тшыкөдін менсьым Петырсө. Воас тулысыд, да съөд арөдз ог аддзыв сійөс, быд шойччан лун кытчөкө пышйө.

Көть өні нин төді, мый Быргысь Петыр пөръяліс

менö, век жö муртса верми виччысьны субöта рытсö да пыр и мöдöдчи кыйсьыны.

Эг кө дышöдчы, и юыс чери козьналіс. Сёяной и менам вежсис. Талун сир жариті. Верманнуд пыравны — гөститöда.

## ПУКЫШТАМÖЙ ЮЯС ДА ТЫЯС ДОРЫН

Гажтöм эськө вöлі Комиын олöмыд, эз кө кытшавны миянöс помтöм пармаяс, гажа ягъяс, быд сикас дзоридзьясөн баситöм видзьяс да, дерт, уна лыда тыяс да юяс.

Важысянь нин ми тöдам чериясыдлысь көрсö; көть и лыа сійö, а чöскыд вöлöга. Кор пызан вылад жаритöм сын либö сир черинянь, семьяыдлы бур праздник. Миян дедъяс да батъяс эз жö черитöгыд овлыны, кыйлісны-выйлісны найöс гожöмын и арын. Юяс да тыяс дорö асьыныс радейтöмсö найö кольлісны и миянлы, асланыс пиянлы.

Шойччан лунöдз лун-мöд на водзджык чери кыйысьяс кутасны лöсьöдчыны: пöсь петтöдзныс корсяласны нидзув, сэсся лэчталасны вугыръяс, чугун тыр пуасны рок, көнтусь вый сэтчö кисьтыштасны, анисöвöй войтъяс содтыштасны. Но чери кө оз шед — шойччöгыс шедас. Та могысь öд унаөн ветлöны юяс да тыяс дорö.

Чери кыйысь тэчас пуд джынъя нол, быттö Сибирö мöдöдчас. Мыйыс сэні абу: донкаяс, свинеч грузъяс, пöрт, чай-сакар, быд сикас вöлöга. Азымджык йöз и треска на сьöрсъыс босьтасны. Войыд

өд кузь, да и сөстөм сынөд вылад кык морт пыдди  
өтнадөн сёян.

Пекнича асывсянь на майшасян: мед көть эз  
зэрмы либө эз гымав-чардав. Чери кыйөмыд өд абу  
на бурлачитөм либө тьоща ордын блин сёйөм, сюр-  
лывлө мудзыс и зэрыс, пöсъявлан и войяссө узытөг  
колявлан.

Век жö лөсьыд кыйсьыныд. Ветлан некымынысь  
ю вылө либө тыясө. Шедыштас кө пуны, жаритны,  
сэссия нэм кежлад братайтчан вугыр шатыдкөд.

Быд сикас кыйсьысьясыд овлөны. Öтияслөн эмөсь  
мотора пыжъяс. Сэтшөм йөзыс, медясө, радейтөны  
визув местаяс, йиръяс, көни пырджык сулалөны  
еджыд черияс. Пыжсяньыс лэдзасны сьөкыд көрт,  
домасясны кылалөмысь, заводитасны швучкыны-  
вуграсьны. Унаысь ва нылыд кылавлас пробкаыд,  
сэссия и коркө дэбнитас. Эн вуграв, кыскы зіль-  
джыка. Тыдалө, самтө кватитис госа сын, со кыдзи  
пессьö, а тэ кыскан и кыскан сийөс пыж дорад,  
сакыд бокад, ковмас кө, здукөн и лэдзан сийөс ваö.  
Сьөлөмыд тэрыба пессьö. Эз өд мын, мича и чери  
шедис. Та бөрын ещö на ярджыка мөдан вуграсьны,  
лөдзьяс ни номъяс оз мешайтны.

Найö, кодъяслөн абуось пыжъяс, ветлөны тепло-  
ходъясөн, автобусьясөн, подөн. Татшөм войтырыс  
ветлывлөны ёнджыка запаньясö, бонаяс вылө. И на  
пиын эмөсь бур мастеръяс. Сэтшөм мича ёдиөс либө  
сирөс кыясны — вежыд петас.

Эмөсь и берегсянь кыйсьысьяс. Татшөмъясыс  
весиг унаөн. Пуксясны берет дорö и сывидзөны  
сэн рытсяньыс асылөдз, оз сёрнитны, оз ветлөдлы-  
ны. Видзөдөны пробка вылас, синъяссө бокö оз веш-  
тивны. Көсьян кө, пуксьы вабергач местаö. И сәни  
эм чериыд, сөмын эн дөзмы, виччысь, коркө өд  
босьтас.

Быдлао колө кужомлун да кад. Сытөг и юква  
вылө чериыд оз шед. Овлө сідз: пукалан час, пука-  
лан лун, а пробкаыд оз и вөрзъыв. Самъястө вежла-  
лан — оз, нинөм вылө оз босът. И друг воас сэтшөм  
кад: өдва удитан лэптавны вугыр шатътө.

Колө висътавны и сэтшөм йөз йылысь, кодъяс  
радейтөны кыйсьыны сөмын тыяс вылын. Шудаосъ  
татшөм йөзыс. Од найөс гажөдөны лэбачьяс, налы  
дугдывтөт өвтөны асланыс чөскыд көрөн дзоридзь-  
яс. Пукалан ты дорын, некод оз мешайт. И тыясын  
уна пөлөс чериас эмөсь. Эм кө сямыд, гортад тыртөт  
он лок.

Медся, дерт, гажа кыйсьыны сәні, кытчө чукөрт-  
чөны уна йөз. Кымын пөлөс сёрнияс-баснияс кывлан  
сәні, вак-вакөн сералан, кымын выль морткод төд-  
масын! Чери кыйсьысьяслөн жара ломтысьысь би-  
пурыйс быдөнөс вөчө братанъясөн да другъясөн.  
А кодкод өтчыд ю бокын юлан тшын дука чай либө  
өти пөртыйсь панялан чөскыд юква — дыр кезлө  
лоан матыса өртөн.

Войыс югыд да лөнъ. Эжва кузя тэрмасытөг  
шывгөны сьөкыд керьяс. Лыа көса пөлөн лэбалө  
еджыд каля, шенасыө ёсь бордьяснас, он гөгөрво  
сьылө либө горзө.

- Асья кыа ворсөдчө кашемир чышьянөн, паль-  
дө узысь вөр-васө, гөрдоват югөрьяс гөгөр сявкйө.  
Регыд мыччыяс шонді, кодлысь петкодчөмсө пыр  
виччысьөны чери кыйысьяс. Сэсся төгөр ловзяс.  
Шонді петөмсө уна гөлөсьясөн чолөмаласны ылі  
муясысь воөм лэбачьяс, ва пыдөсын уялысь чериас.  
Кыпөдчас кокныдик төв, шыбитас турунъяс да  
дзоридзьяс вылысь сикөтш моль кодъ лысвасө, гу-  
сьөникөн мыйкө шөпкөдыштас чөла сулалысь  
козьяслы, веж паськөма кызьяслы, котөртас ю вер-  
көсөдыс, ас бөрсяыс посныдик тшупөдъяс коляс.

Онi нин чери кыйысьястö би дорад он кут: заводитчис кыйсян кад. Но дыр на оз ваймы уна киясөн песталём бипур.

## СЁР АРЫН

Коді тöдас, мый дыра нин бугжылясьö арся поводдяйс. Лунтыр зэрас, войбыд бушуйтчас, здук жежлö лөнныштлас, бордьяссö личöдлас, сэсса выльысь кыпöдчас вына тöv, заводитас нетшкыны пуяслысь корьяс, заборьясысь прöстмём пövьяс. Дыш и ывлаас петны, быттьö абу и вöвлöмаёсь шоньд луньяс, югыд войяс. Оз нин гоньявны да петкöдлыны вежнысö йöзлысь дзоридзьяс, дженьыд тай вöлöма налөн олан кадныс, кусіны, вывтi водз пöрысьмысны. Оз кывны ягьясын и вотчысьяслөн гөлöсьяс. Мунісны шоньд муясö лэбачьяс, эновтісны миянöс тулысöдз уткаяс, дзодзөгьяс, юсьяс. Зумышöсь лоины юяс, тыяс. Быдөнлы аслыс кад.

Оз нин гыбавны черияс, тыдалö, киссьём сукман кодь кöдзыд да лёк поводдяйд и найöс оз гажöд. Кöть и ва пытшкөсад тöлыс ни зэрыс оз веськав, тöдöны: помасис гожём.

Важөн нин эз петкöдчыв синьяс ёрысь шондi, дзессьöма кыз кымөрьяс улö, оз кöсйы шонтыны.

Матыстчö шойччан лун, бара тiрöдчö сьölöмыс медся яр чери кыйысьлөн. Окота на кöть öтчид ветлыны ю дорö, прöщайтчыны тöдса местаясыскöд, радейтана вөр-ваыскöд.

«Сідзкö, медбөрьяысь ветла. Регыд сэсса кын-

мавны кутас, лым вермас усьны, сэки нин мыйсяма кыйсьом-выйсьом», — шуи аслым ме.

Со и тодса места. Оз нин тыдавны гожомын моз чери кыйысьяс, тодомысь, лёк поводдяыс найос шоньд керкаясын пукодё. Отнамлы ковмас колявны бубуля войсё. Муртса удиті шыбитны донкаяссё, ю весьтё ошодчис нин пемыд шебрас. Дженьыдось аръя луньясыд, зато войыс кузь, мыйсё эг удит думайтны бипур дорын куткырвидзигон, кутшом дыр лои кывзыны толыслысь пошигтомсё, гыяслысь скораломсё, кос пуяслысь дзуртом-зыртчомсё.

Пессьо Эжва, комияслон ыджыд да вына ю. Коть пемыдысла и эт аддзы сійос, но кыла сылысь вөрөшитчомсё.

Некыдз оз кёсийы оэйыны бипур, уль песьясыс чишкёны, сёласёны, но толыс отсалё ярмодны сійос, сетё вын-эбёс. Оз нин лунся мозыс зэр, тыдалё, кымөрьясылон косьмис синваыс. Зэр пыддиыс оні ыдждалё лэчыд төв, писькодчё лыодзыд, кёсийо кынтыны пось сёлөмтө.

Нюжодчи би дорё, водзёс сотё, мышкёй — кынмө. Бергала, жөдза, ог тёд, кызди и виччысьны асывсё. Гашкё, куимысь юи чай, медым өдийджык мунас кадыс.

Век жё аслым рад: эг повззы, локті кыйсьыны. Сідзкё, вирөдз пырөма чери кыян делёыс, ог нин вермы сытөг овны.

Медым вот тадзи, отнасөн, пукавны да колявны арся кузь войсё, кынмыны и котасьны! Оз быдөн вермыны миритчыны такөд, небыд вольпасьнысё вежны би дорё вольсалом пөв вылө, кутшомкө нельвит йөрш да налим вёсна колявны узьтөм войяс.

Сэсса тай коркё сявкнитіс жё югыд рөм. Буракё, помасьны кутіс биа висьом кодь войыс, терпиті помөдз. Оні позьё и кыйсянторьясёс видлавны.

Гашкө и черитор шедас. Быд кыйсысь өд мыйкө да мыйкө виччысь, некод оз косьы тыртөм сумкаөн бергөдчыны гортас.

Первойя донкаыс куш, вугыръясас өшйөмаось кырсыяс да турунторъяс. И модас некутшөм чери абу.

«Гортын кө узи — бурджык вөлі», — заводити ыдждавны, видны ачымөс. Но тадзисө прөста шуася. Нинөм вылө эськө гортын эг пукав.

Мөді видлавны медбөръя донкасө.

Но мый тайө? Кодкө со трук-трак вөчис, зэлавліс быдсөн жилкаыс. Дерт, мыйкө эм. А здук мысти мыччысис нин сой кузя налим, ниглясь, шенась бөжнас. Өдйөджык шыбиті берөгө, челядь моз радла.

Эз весьшөрө ло волөмыс. Шуда на вөлөма. Өні нин менам вуні ставыс: и дзык пемыд войыс, и бритва кодь лэчyd төлыс. Быттьө нинөм эз и вөв.

## ШУДА КЫСНАН

Дарья тьөтлөн керкаыс дзык кыр йылас. Пуксыс Дарья өшинь дорас, видзөдө, нимкодысь. Син водзас — лым улө дзебсьөм видзьяс, вөр дяс, кыр горулас нюжөдчөм паськыд ты.

Пөрысьмис нин нывбаба, пенсионеркаөн лои, а тыыс пыр на сэтшөм, важ моз уна мортөс чериөн вердө-номсөдлө.

Бөръя воясас татчө частө кутісны воливлыны карса чери кыйысьяс. Шойччан лунъясө, гашкө, кызь машина тыр воасны йөзыс.

Дарья видзөдө кыйсьысьяс вылө да ас кежас дивуйтчө: «Колө жө та ылнаөдз вуграсьны локны, да ещө төлын». Но аслыс любө: со кутшөм унаөн радейтөны налысь тысө. Жаль, мужикыс томөн кадөн пөгибнитис, колөкө, тшөтш лэччыліс вуграсьны, ассьыс Дарьюшкасө свежөй чериөн номсөдліс.

Оти татшөм лунө поводдяыс сулаліс торья көдзыд. Петан кө ывлаө, лэчыд төлыс пыр и заводитас чеплявны ныртө, пельястө, чужөмтө, шоныд пасьыд и то оз видз збоймөм көдзыдсьыс.

Дарья видзөдліс төдса ты вылө да шай-паймуніс быдсөн: «Но и но, вөтлө кө кодкө найөс тортсьыныс-а». А чери кыйысьяс быттө оз и казавны чизыр төвсө, трачкөдчысь көдзыдсө, зутшкөны пыридзьяснас ён йи кузя, көчьяс моз котралөны йордансянь йөрданө, йөктөны, шенасьөны кияснас. Абу жө, буракө, шоныд.

Дарья пелькөдыштис керка пытшкөссө, ломтис көрт пач, сэсся заводитис пөсь шомөн пузьөдны ыджыд зобья самөвар. Сьөн дояркаөн уджалігөн на премируйтлісны. Зэв пөслукман важиник самөварыс, өдйө и пузис.

«Час лэччыла да пөсь ва юны көть корла кыйсьысьяссө, дзикөдз изөймитасны». Бывті нин найө жальөсь кажитчисны олөма нывбабалы.

Лэччис өд, эз повзбы көдзыдсьыс. А йи вылас, гашкө, витсө розь вөчөмаөсь. «Видзөдла, кызди көть йи пырыс кыйсьөны, некор на өд матысяньыс эг аддзыв».

— Ловьяөсь на?— серам сорөн шыасис Дарья тьöt сьөд пася олөма морт дінө.

— Мый миянкөд лоас,— вочавидзис кыйсьысь и лэптис йөрданысь вель ыджыд ёкышөс.

— Шедө тай... Но и но... Он весьшөрө та ылнасянь волывлөй.— Нывбаба казяліс лым вылысь

чери чукөр да ещö на кутіс дивуйтчыны.— Видзöд-тö, видзöдтö, мыйта кыйöмьд.

Бокунджык тыдалöны морт вит-квайт. Дарья тьöt мөдöдчис на дорö. Сэні унджыкыс том йöз, шапка пельяссö лэдзалöмаöсь, кианыс дженьыдик вугыр шатьяс, вөрöдöны найöс, то лэптыласны, то бөр лэдзасны. Нопъяс дорас быдöнлөн чери — код-лөн уна, кодлөн кымынкö на.

— Тьötö, гашкö, тшötш кыйсьыны кöсьян? Вер-мам сетны вугыр шать,— шыасис нывбаба дорö банийöм чужöма зон.

— Ме помысь... Со тай, чурки-буди, тiянлы шедö, мед кöть не вомдзавны... Чай юны тiянöс кора, шонтысянныд,— сэсся Дарья индiс керка вы-лас.— Дзик со матын и ола, и кöрт пач ломтысьö.

— Самöварным миян сьöрысь, термосын пöсь чай вöдитам,— шыасис кодкö.— Корöм вылад аттьö, но ог эштöй. Аддзан, кызди зiлям, а то гöтыръяс-ным черитöгыд гортö оз сибöдны.

— Бать-ö-ö! Меным бара шедi!

Дарья аддзис горзысь детинаöс, муніс сы дорö. Ар дас кыка чангыль ныра Федя буретш кыснан-сьыс мездіс пань кузя ёкышöс. Сійö аддзис тöдтöм нывбабаöс да пыр и кутіс ошйысьны:

— Батьöлы оз шед, а ме сöмын кыскала. Зепья-сын быдлаын нин чери. Колöкö, петкöдла.

— Оз ков, сідз верита, бур пийöй. Вот кöдзыд сöмын, и мыйла мамыд татшöмнас лэдзöма тэнö?

— Ньöти абу кöдзыд.

Дарья дыр видзöдiс ичöt кыйсьысь вылö. Дум-нас жалитіс и радліс сы вöсна. Вывті нин старайт-чис зонка, синъяссö оз вештыв руалысь розь вы-лысь. Сэсся детиналы шедi кельчи, сы бöрын лэптiс ичötик ёкышöс. Аслыс любöыс. Сэн жö нывбаба сійöс быд ногыс ошкис:



— Ай да, бур пи, кутшөм шуда. Со кызди чериясыд радейтөны тэнө. Вот мамыд лоо рад. Менам кө эськө вөлі тэ кодь пиыс.

— Кыснаныс бур, любөй чери кутчысьө, менам сэтшөмъясыс ещө на эмось. Ыджыд вокөй вөчалө.

— Гашкө, өтикөс и меным сетан?

Детина эз вермы өткажитны меліа сёрнитысь тыткалы. Разис мешөксө, кыкис сатысь дась вөчөм вугыр шать, мыччис Дарьялы.

— На, тайө кыснан вылас кымөра луньясө бура шедө,— велөдіс Федя, быттө асьсө лыддис нин медся төлка кыйсьысьөн.

— Бөрти пырав шонтысьныд. Пөсь йөлөн юкта-ла, выя шаньгаөн гөститөда.

Дарья тыт муніс, сьөрсьыс нуис детинаөн сетөм кыснана вугыр шатьсө.

Пемдыштөм бөрас сөмын тыртөммис ыджыд ты. Сэтчө өні бара көзяинөн коли лэчыд төв. Куйлө Дарья тыт шоньд пөлатяс, а аслас син водзас сера паськөма ёкыштяс, посныдик сьөмъяса кельчияс.

Мөд луннас ньөти виччысьтөг поводдяыс небзис, тыдалө, эз тырмы выныс дырсө көдзыдавны. Сикт весьтөд уліті ваткыльтісны паськыд кымөръяс, быттө корсисны му вылө пуксян места. Сынөдас гарччисны-лэбалісны бобувъяс кодь лым чиръяс да кокныдика лэчывлісны коді кытчө вермис.

Дарья тытлы оз пукавсьы гортас, окота видлыны карса детинаөн пөдаритөм кыснансө, колөкө, и аслыс шедас пумөн чери. Төрыт со мый дыра видзөдіс да велөдчис, кызди кыйсьөны бур йөзыс. Кыйкнитліс-видзөдліс өшиньөдыс ты вылө. Талун сәні некод абу. Да и ки чышкөдъяс да юрлөс эжөдъяс колө пожъявны. Пасьтасис, тазйө пунктіс вугыр шатьсө, вевттис сійөс пожъявны лөсьөдөм көлуйөн, босьтіс пыридз, коді мужикыс война вылө усьөм-

сянь сулаліс посводз пельбас, и мөдөдчис. Медым сиктсаяс эз казавны сылысь тешитчөмсө, муніс ты помөдзыс. Татысь некод оз аддзы.

Йи вылө писькөдөм розьяс өти войнад абу на удитөмаөсь прамөя кынмыны, тувкнитас пыридзнас кокныдика — и бара дась, сөмын кыйсы. «Видлам и ми, колөкө, мыйкө да и шедас. Дегинаыс тай ошйысис, зэв пө бур кыснаныс. И кымөра луньясө пө, быттьө, сы вылө шедө».

Дарья видзөдліс гөгөрбок, оз-ө кодкө видзөд, сәсся вөлисти ләдзис югъялан кыснансө йи улө. Эз на удит нюжавны көвйис, кодкө, кылө, нетшыштис. Ләптис — ёкыш шедөма, да и абу ичөт. Босьтис чукырөсь кияснас кыйөмторсө, челядь моз радлө.

Ләптас өти розыысь кык-куим чери, вежас местасө, йөрданъясыс пөшти дасьөсь, оз ков пөсь петөдзыд писькөдчыны. Вунөдіс пожъясьөм йывсьыс, тазсө вель ылө колис. А чери содө и содө, ковмис нагруниксө пөрччыны, да сәтчө тәчны. Быд чери шедөм бөрын думнас висьталө ошкана кывьяс төдтөм дегиналы. «Бөжөс кө көтөдлі, и юква кута панявны» — шешьялө Дарья тьөт.

Эз и казав, кыдзи коли луныс. Рөмдыны нин кутіс, а тысө пыр на жаль энөвтны. Колөкө, и пемдытөдзыс кыйсис, да дугдіс дэбөдчыны чериыд.

## АСЫВ ТӨВ — ЛЕК ТӨВ

Вуграсьысыяс медсясө радейтөны, кор пөльтө төлыс лунвывсянь либө рытиввывсянь. Татшөм поводдянад пырдзык мыйкө кыян. И аслыд лө-

сьыд, кор онялө гоҗся шондi, рыт-асывнас ва веркөс-  
ыс рөмпөштан кодь шыльыд, войясыс небыдөсь, би  
дорө көть эн и матыстчыв. Сынөдыс пөтөса, шоныд  
паськөм ни сапөг оз ков, ывлаыс лейкуйтө-шонтө.

Вой төлыд көть көдзыд да скөр, но и сэки чери-  
ыд шедө, торъя нин ляпаяс, едияс.

Зато асыв төв дөзмөдө вуграсьысьясөс. Быттё  
сэтшөм жө шоныд төлыс, а ва пытшкөсын олысьяс  
оз радейтны татшөм поводдясө. Асыв төвнад и чери-  
ясыд оз гыбавны, дзесьёны кытчөкө ставөн. Пука-  
лан час, пукалан лун, а садөкыд тыртөм.

Омөля черияс босьтөны и гоҗөм шөрнас, ваыс  
юясысь сэтшөма шоналас, мый розъявны кутас.  
Видзөдлан кө бонаяс бокө, берегъяс пөлөн — быд-  
лаын гөвквидзөны виж нюйтъяс да и ваыс дзик  
мөд пөлөс: гудыртчөма. Сьökыд сэки черияслы  
овны, быттё кольмөмаөсь либө висьёны. Та вөсна  
йирьясө да визув вылө шыбитчөны, көнъясын ваыс  
джуджыдджык да көдзыдджык.

Тшапөсь чериясыд и ва туигөн. Сэк нин сам  
вылад найө оз уськөдчыны. Сёяныс, буракө, и сідзи  
тырмө. Шнырайтөны берегъяс пөлөн, кодъяс бара  
пырисны ва улө, өктөны сэтысь быд сикас гагъясөс,  
лельөясөс. Да и ваыс сэки унатор вайө, тшыгъявны  
оз лэдз.

Веськалас татшөм каднас ю вылө чери кыйысь,  
кокъяс мудзтөдзыс ветлөдлас местаысь-местаө, а  
төлк ни слөй. Оз вөрөд некод пробкатө, көть и на  
вылө синъяс доймытөдзыд видзөдан. Лэптан донка-  
тө, а сәні сөмын ёсь щөтя йөрш өшалө, бөр көть ва-  
ас шыбит.

Төдөны ваын олысьяс и поводдя веҗсьөмтө, а  
кыдзи төдөны, налысь колө юавны, сөмын вот сёр-  
нитныс оз кужны.

Талун со бара нин пушкө асыв төв. Чери кый-

ысыяс вель частö видзöдлöны енэжö, быттö кöс-  
йöны корны сылысь, мед кусынътас тöвсö мöдарö,  
вежас мунан туйсö. Кодсюрöөс дышöдöма нин дуг-  
дывтöг видлавны донкаяссö, водалöмаöсь бонаяс  
вылö, картузъяснас тупкöмаöсь чужöмъяссö пöсь  
шондi югөръясысь, дöзмöдчысь гутъясысь да лöдзь-  
ясысь. Сöмын медся зiльясыс кыйсöны, шойч-  
чыштны оз кöсйыны.

Федя да Лёва бара öтлаынöсь. Пöрччöмаöсь  
майкаяснысö, кöмъяснысö. Öтпырйö вöчöны кык  
удж: кыйсöны и гожйöдчöны. Лёваöс дышöдöма  
нин прöста копрасыны, оз и видзöдлы донка вылас.  
Федя частö вежлалö самсö, öти вугырö самалас  
нидзув, мöдö нянь ёкмыль, мукöдъясас опарыш да  
пöжöм анькытш.

Детинкаяс кыкысь нин чай юисны, нельысь ку-  
пайтчисны, гожъялöмысла ки-кокъясныс важöн  
гöрдöдiсны, а черияс быттö унмовсöмаöсь став-  
ныс. Шондiыс увлань нин лэччö, гöгыльтчö пос-  
ныдик козъяс пöлөн, бур ногөн кö, öнi медся бур  
кыйсян кад. Он тай босьт.

— Öмидз сёйны ветлам,— очсыштiс Лёва да  
паськöдлiс вöсныдик сойяссö.— Шедас öмöй асыв  
тöлөн кутшöмкö ёс?

Оз радейт Федя öтпырйö кык кöчöс кыйны. Эз  
вöрзбы места вывсьыс, бара вежис донкасыс самъ-  
яссö. Öти вугырö весиг ловъя чиркöс самалiс, кодöс  
луннас на кутiс да видзис истöг кöрöбкаын.

Öтнас мунис Лёва öмидзөн чöсмасыны. Мунысь-  
лы туй, сöмын мыйкö сюрас оз. Запаньса посёлөк-  
ын олысь челядь öд ушлöйöсь, колöккö, важöн кока-  
лисны став вотöсьяссö.

Лёва муномянь кадыс коли час кымын, а гаш-  
кö, и унджык. Шондi эз нин важ моз югдöд, сунгы-  
сис пуяс пöвстö, муртса сöмын тыдыштö.

Зільмисны чери кыйысьяс, шонді лэччигад да шонді петігад өд кыйсьөм вылад медся бур кад. Сэки кө нин оз шед, луннад этша босьтан найөс. Федя кийн кузь воропа сак. Детинка өти донка видзөдлас, сэсья мөдөс лэптылас. Рок мешөкъяссө кинас топөдлас, мед бурджыка петас черияслы вөлөгаыс. Сьөлөм вылас век жө абу долыд. Гашкө, дзик первойысь, кызди сийө заводитис кыйсьыны, тыртөг ковмас мунны гортас. Аски мамыслөн чужан лун, гөстьясөс көсийө чукөртлыны, кутшөма эськө лөсяліс празничной пызан вылын свежөйыд.

Өти донкаын кодкө трук-трак вөчис. «Чери өмөй? Колөкө, и кырсь либө лөпт крукасис вугырас». Кыскө надзөникөн донкасө, аслас сьөлөмыс пессьө, син бөжнас сак вылас кыйкнитлас. Бузымтчис, песовтчис паськыд ёді, пөв моз ва веркөсас водис.

Сакыштіс, радысла горөдіс: «Лёва!» Но и ёді! Шоча веськавлөны татшөм гырысьясыд, вермөма тай быдмыныс, тырмөма, майбыр, көрымыс. Өні позьө и гортө мунны. Мамсө, именинницаөс, эз янөд.

Лёва кылөма другыслысь горөдөмсө, котөрөн локтіс. Чужөмсө номъяс вирөдз сөйөмаөсь.

— Видзөдлы, мый менам көрзинаын куйлө,— шуис Федя.

Лёва завидысла быдсөн кельдөдліс, уськөдчис аслас донкаяс дінө, окота вөлі тшөтш кыйны Федялөн кодь ёдіөс. Эк, став вугыръясыс кушөсь! Гашкө, ачыс мыжа: кокныда көсийө кыйны чериөс. А найө, вөлөмкө, суюсьөсь, радейтөны төлка кыйсьысь-өс да чөскыд сам.

Вот тэныд и асыв төв!

## МЕДСЯ ВИНЁВ ЧЕРИ

Мыйён чуткасысь лежнөг аслас вожьяс вылө ошодас гөрдоват рёма дзоридзьяс, гыча тыясын заводитчас шума олөм: паськыд сьёмьяса укшаль черияс заводитасны кульмыны. Найө уялөны кузь лунтыр, сялькөдчөны, ызөдчөны, оз инасьны местаяс вылас. Мукөд дырйи найө рөдмөны весиг торф перьян местаясө, вөр пөвстө дзебсьөм нейджыд тыасө.

Гычьяс торьялөны мукөд чериясысь асланыс винёвлунөн. Миян юясысь да тыясысь өдвакө сюр-ас мөд сэтшөм чери, коді эськө гыч моз дыр вер-мис овны ловйөн ваысь лэптөм бөрын. А сійө олө, оз лыда минутаяс, а некымын час. Көдзыд повод-дя дырйи, кор тыяс кынмасны дзик му бердөдзыс, унджык чериясыс сэтысь пөдөны, а гычьяс ко-льөны ловьяөсь. Найө пырасны нюйт пытшкө, узь-өны сәні йи сывтөдзыс.

Өні на дум вылын татшөмтор: кызкө өти гож-ся асылө Ольөксан дядь нуөдіс менө өти тыө, кыт-чө кык лун сайө вөйтлөма трегубеч.

Лэптис угодьесө, а сәні вөрөшитчө, гашкө, сө гыч. Ставыс өткодьөсь, сідзи и дзирдалөны шонді водзын.

Гортө бергөдчим рытъявылыс нин, ме кашки да кыски пестер, а Ольөксан дядь вайис ассьыс кый-сян көлуйсө. Воим гортө да ректім черисө тазйө. Ой, мый сәки вөлі, ме чеччалі таз бокын да торзі:

— Ловьяөсь, ловьяөсь! Вөрөшитчөны!

А өти гыч чеччыштіс весиг тазйысь, но джодж-өдз сідзи и эз во: тшапнитіс сійөс Мурка, коді чери дуксө кылөм бөрын ниртчис пызан дорын, виччы-сис, кор сылы вичмыштас чөскыд сәян.

— Эн горзы, чериясыс сэсса оз кутны шедны, — кылі паччөрсянь бабёлысь өлөдана кывъяс.

«Кызди нө сідз, асывсянныс өд найө олісны пес-терын, абу и кулөмаось», — ас кежын дыр на дивуйтчи ме. Сэсса Ольөксан дядьысь гусьөн суйи зептө куим чери, петі ывлаө да лэдзи найөс юкмөсө. Гычъяс мыйкө дыра кежлө гатшасьлісны, сэсса заводитісны вөрөшитчыны бөжнас, а недыр мысти вошины нин ва пытшкө. Ме, дерт, рад, черияслы сёйны шыблалі нянь торъяс, дыр на видзөді юкмөс пытшкө, мися, гашкө, бара на петкөдчыласны найө.

Пыри гортө, а сәні пач нин локтөмаось, свежөй юква лөсьөдчөны пуны. Бабө чери керө, Ольөксан дядь картофель весалө. И меным вичмис удж: бабө черияссө тшөктіс мыськавны. Сэсса чугунө ачым и пукті медся гырысь гычъяссө, быд пөрйө лыдди: өти... кык... куим... Кор вои дасөдз, бабө өлөдіс:

— Тырмас, ставсө өд өтпырйө он пу.

— Тырмас кө и тырмас. Сідз нин чугун джын-йыс лои.

Жар пачын недыр мысти жваркйис-пуис нин юква, ме тяпкөді вомөс да виччыси, кор позьө заводитны панясыны, кынөмөй веськыда нюкыртіс, корис сёйны.

Муртса верми пусьөмсө виччысьны. Бабө кисьтіс юквасө ыджыд тасьтіө, сэсса паньөн мөдіс лэп-тавны черияссө мөд дозйө. Ме бара куті лыддыны.

— Öти... Кык... Куим... Көкъямыс тай нө сөмын, ме жө дас чери сәтчө пуктылі, ас дырйиныд лыдди.

— Э-э... Сідзкө чеччыштісны чугунсьыд, — читкыраліс синъяссө Ольөксан. — Найө өд лёка винёвось.

Нырө өвтис нин чөскыд юква көр, дуксьыс пө-тан. Зіля панясим ставным, торъя нин ме. Татшөм юкватө некор на эг сёйлы.

Тайо лоомтор бoрас коли, гашкo, кык во. Ме важoн нин вунoдлi юкмoсo лeдзлoм гычъяс йылысь Но найo абу кулoмаoсь. Oти гыч меным весиг шeдлi чeпняo, кор юкмoсысь лeптaлi вa. Рытo-дзыс сийoс видзи гoртын, вa тыра тазыйн, сeсся лoктiс Мишка другoй да кутiс корны аслыс. Лои сетны, чeри пьддиыс зато сийo меным сетiс кoрт ручка, кодлoн oти помас пeрo, a мoдaс — карандаш. Oнoдз видзa друглысь пoдаркисo. Сийo ручкaнaс и тайo висьтeсo гижи.

А гычъяс унa вo нa oлiсны миян да Мишкaяc юкмoсын.

## КЕЛЬЧИЫД OД ЧЕРИ ЖO...

Койты ю вылын талун асывсянныс бара гажa. Муртса на писькoдчыштiс югыд рoм, кьдзи кутiсны лoктaвны татчo кыйсьысьяс. Татысь позис адзыны вoр лeдзысьясoс, строительясoс, шoфeръясoс и пeрo-ручка кутысьясoс. Вeлoдчысьяслoн асланыс бригада, торйoн нo кутшoм кыйсьoм. Oтлаад дурыштны и ворсыштны позьo, да и кодлы мый шeдo, ставыс син водзын. А оз кo шeд чeриыс, луныс кoть кольo гажaa, лoo мый казътывны школаын, гoртын.

Детинкaяc пьысь ми аддзим и важ тoдсаoс, Федяoс, кодi тай пoдаритiс асьыс шуда кыснансo Дарья тьoтлы. Дeтина чангыля нырнaс кыскыштiс вaсoд сынoдсo, синъяснас кытшoвтiс кузь ты гoгoр, сeсся шуыштiс:

— Ме тай татчo вoйтaся-a.

Кытчo Федя, сeтчo и мукoд. Сийo oд мoдoд вo нин кыйсьo, тoдo, кoни бурджыкa кутaс шeдны.

Унаоң весиг зонпоснияс пиысь завидьтоны сылы, косьоны лоны Федя кодь жө удалон да суюсьон. Мый көть и оз на быдөнлы тайо удайтчы.

Детинкаяс шыбитисны ас вывсьыныс кокньыдик мешокъяс, заводитисны писькодлы йорданъяс. Шоньд. Пошигто небыд төв, быттьо сьылө бай-бай. Лосьыд татшөм лунъяснас ывла вылын.

— Федь, кутшөм кыснан вылө талун шедас?

— Кымөра, сідзкө югыдджык кыснан колө вөйтлыны, — юрсө лэптывтөг вочавидзис медся мастер чери кыйысь.

А ёкышъяс югыд ни пемыд кыснан вылө эз косьыны босьтны. Гашкө, часджын өвтчисны вугыр шатъясөн том кыйсьысьяс, некодлы өти лов эз шед. Федя куим кыснан нин вежліс, а чери абу и абу. Дзесьсьомаось, оз косьыны петкодчыны. Юръяс-ыс өд налөн пыдын, көнкө, видзөдоны, кызди зильоны вуграсьысь войтыр, да сералөны на вылын.

— Ислалі кө, бурджык вөлі, — заводитис норасыны медся кузь тушаа, кельчи кодь гөгрөс синъяса Лёва.

— Гашкө, мөд ты вылө ветламөй? — шуасисны мукөдъяс.

— Ме тай некытчө ог мун-а. Кыйсьөмыд өд сэтшөм, кор шедө, кор и оз.

Федялөн кывъясыс ышөдыштисны детинкаясөс, бара заводитисны вуграсьны. Копрасьоны дженъыдик вугыр шатъяс кыйсьысьяс кыын, а йиувса олысьяс оз и матыстчывны кыснанъяс дорө. «Мыйсяма тайо кыйсьөм!» — видөны чериясөс йорданъяс дорын сулалысьяс.

— Эк, вөчны эськө сэтшөм аппарат, медым суйлан сійөс ва пытшкас да пыр и аддзан, көні чериясыс чукөртчөмаось, — скөра шыбитис йи вылө пыридзсө Лёва.

— Мый нө, сідзкө, он лөсьөд, сямьд кө эм?—  
вомалис сійөс Федя.

— Ме тай Затон курьяө вөлі нуөдча, йөршсө сэтись сөмын курав,— вишкис Коля Сватов.

— Көні ми абуөсь, быдлаын шедө,— бара кыліс Федялөн гөлөс.— Вайө ветламө мукөд кыйсьысьяс дорас, видзөдлам, шедө оз налы.

Тайө шуөмыс детинкаяслы быдөнлы воис сьөлөм вылас. Гартлісны жилкаяссө, мөдөдчисны ты шөрас, көні кыйсисны олөма йөз. Отилаө матыстчыласны, мөдлаө воласны, быдөн норасьоны, некодлөн прамөйджык чери абу.

Татшөмтор бөрад Федялөн другьясыс эз нин көтөдлыны вугыр шатьяснысө, найө мыйкө, кылө, вашкөдчыштисны ас костаныс, сэсся Лёва шыясис:

— Муна гортө да узя, бурджык лөө.

Федя дөзмөмпырысь мерайтис сійөс синьяснас, быттьө первойьс аддзис өти парта сайын пукалысь детинаөс, сэсся збодера өвтыштис кинас.

— Узьысь Ваньлы тэ вок, а абу кыйсьысь. Мун, а то пельөй нин сьөдмис тэнад дзуртөмысь.

Эновтисны Федяөс другьясыс, быттьө сійө вөлі мыжа чери шедтөмысь. Детина өбидаясла гурчнитис пиньяснас да бөр бертөдчис аслас кыйсян местаө. Ыджыд вокыс киясөн вөчөм кыснансө ваө эз нин лэдз. Сы пыдди мешөксьыс кыскис мөд пөлөс вугыр шать. Жилка помын өшаліс кык вугыр: өтиыс — мормышка, мөдыс — прөстөй вугыр. Самалис сэтчө комельтор, лэдзис йөрданө. Ва веркөсө сувтис ичөтик төрд пробка. «Видла, колөкө, кельчи кутас шедны. Оз вермы лоны, мый тані чери абу». Сэсся шөрыштис рудзөг нянь шөрөм, курччаліс сійөс вомас да заводитис шыблавны ваас.

Гижөмөн он вермы висьтавны ставсө, мый вөлі, мый аддзыліс Федя. Эз на коль и вит минута, кызди

гөрд пробка сунгысьліс-вошліс ва пытшкө. Дитина эз вуграв, өдйө лэптіс. Медводдза кельчи... Сы бөрын мөд... Коймөд... Сэсса кутіс помся лэптавыны. Содө кельчияслөн лыдыс, содө дитиналөн радлуныс.

Бур, мый эз кывзысь Лёвалысь да кольччис. Тыртөм киён эськө сэки ковмис локны.

Дөзмисны, буракө, чери кыйысьяс. Ставөн мөдөдчисны гортаныс. Матыстчисны өткөн вуграсьысь дитина дінө — чуймисны, Федялөн чериыс быдса чукөр, ставыс кельчияс.

— Вот дивөыд, ми пөсявтөдз розьөдчим, а юк-ва вылө эг кыйөй... Молодеч... Тэ, тыдалө, вугыр шатьөн и чулжөмыд.

Любө вөлі кывзыны тайө ошкана кывъяссө Федялы, радлуныс муртса эз пет ортсө, вом доръясыс шешмунлісны.

— Ставыс өткодь кельчи. Уна кыйөмыд, уна...

— Кельчиыд өд чери жө, — тшапа шуыштіс том кыйсьысь и бара лэптіс чери.

Олөма войтыр, пыридызьяс вылас өшөдчөмөн, дыр на сулалісны Федя гөгөр.

## КАНИКУЛЪЯС ДЫРҢИ

Заводитчисны төвся каникулъяс. Федя Подоров бара нин нуөдө другъяссө кыйсьыны.

— Мунад аски мекөд Сизь тыө? Чериясыс пө сәні куш вугыр вылө и то кутчысьөны.

Лёвалы көть абу окота лунсө воштыны, кино вылө сьөлөмыс кыскө, но Федялөн висьталөмыс и сійөс вөрзөдіс. Коля Сватов накөд жө лөсьөдчө мунны.

Аскинас пемыднас на и мөдөдчисны. Автобусысь петөм бөрын лэччисны Чов ю вылө да заводитисны веськыдавны. Лымйыс таво зэв на ляпкыд, лампа ни лыжи оз ков, кокъясыд сөмын мед вөліны чождьсь.

Сулаліс кос поводдя, абу ёна көдзыд. Төвся кадад ывлаыс мича: төгөр еджыд да сөстөм. Пуяс гыөртөмаөсь, вөччөмаөсь еджыд паськөмөн. Эжва вылын кодкө пыридзасис. Детинаяс матыстчисны да аддзисны пөрысь мортөс. Сы вылын дженьыдик пась, кокас колошиа ыджыд гынкөм, ус-тошкыс дзормыштөма.

— Мый нө вөчан, дедушка?— юалис Лёва.

— Мый нө вөчлөны ю вылын... Кыйся, горш налимъясөс кыскала, медым омөльдзыка бырөдасны посни чериясөс.

Мыйөн артмис йи вылө вель ыджыд розь, дед босьтис коколюка моз крукыльтөм кыз сутуга, лэдзліс сійөс йөрданас да кыскис продольник. Детинкаяслы вывті нин окота вөлі видзөдлыны, шедас оз мыйкө пөрысь мортлы.

Дед лэптис вель ыджыд налим, сэсся недыр мысти мөдөс.

— Вот тайө кыйсьөм, абу йөршъясыд,— дивуйтчис Лёва да тяпкөдіс вомсө, быттё паняліс нин налим юква.

— Меным некор на татшөм гырысь чериыс эз шедлы,— балябөжсө гыжъяліс Коля Сватов.

— Вын пуктан — и чери сёян. Сөмын вот киясөй кынмөны,— варовитис дед.— Эн пөрысьмөй, бур пиян.

Не Федя кө, детинкаяс дыр на сулалісны дед дорын, вывті нин лөсьыд видзөдныд дась чериас вылад.

Куим друг лунтыр кыйсисны Сизь тыын. Федя-

лы, дерт, шеді, а Лёвалён да Колялён бара зепъясны кушөсь, не кө лыддыны гоз-мөд йөршөс да чунь кузя кельчиөс. Наысь өд юкватө он пу.

Бөрсө локтигөн, кор воисны дедөн кыйсян месаө, Лёва ыджыда ышловзис да Колялы шөпнитис:

— Сватов, аски волам татчө, лэптавлам подольникъяссө.

Коля воча кыв пыдди мигнитис Лёвалы.

\* \* \*

Мөд луннас Коля да Лёва и збыльысь мөдөдчисны пакөститчыны. Мунисны Федяысь гусьон, медым аслыныс унджык сюрө.

Дедлөн подольник лэдзан йөрданыс абу на удитөма ёна кынмыны. Пыриднад өти здукөн и розьөдисны. Асьныс полөны жө, мед көть найөс кыйсьысьыс оз су, кыйкъялөны гөгөр, тэрмасьоны. Босьтисны чери кыйысьлысь лым пиө дзёбөм проволокасө, заводитисны корсьны продольник.

Өти здукөн дед продольникысь нель налим перйисны, сэсся продольникъяссө лёк ногөн бөр шыбитисны ваө и айда гортө. Юксисны, эз өбөдитны өта-мөдсө. Любөысла тойласьоны, дурөны. Со куштөм кокниа налы налимъясыд шедисны.

— Аски бара ветлам,— ышөдис Коляөс Лёва.

— Сөмын Федькалы немтор эн висьтав.

— А мамъяснымлы кызди висьталам?

— Шуам, вуграсьны ветлим,— велөдис Лёва.

— Оз кө веритны?— майшасис Коля.

— Талун дзёблы черитө, а аски вугыр шать босьтам да йөршъясөс тшөтш кыям, сэки кокныдджык лоө пөръявны найөс.

Но пакөститчысь детинкаяслысь көсийөмъяссө торкис кыйсьысь дед. Кызди тайө лөи, асьныд лыддьянды.

Рытъявылыс Лёва ордö пырисны Федя да Коля.  
— Лёва, школаö мунам. Талун сэтчö локтö ку-  
тшöмкö важ коммунист. Вожатöйным тшöктис чу-  
кортчыны дзик пыр.

Воисны школаö, а сәни челядь тырыс нин.  
И учителяс локтöмаöсь. Сәсся коркö и воис тöсть,  
воротника выль пальтоа, тошсö шыльöдöма, усьяс-  
ыс чурвидзöны ортсö, быттö лэбзыны көсйöны.  
Гөстьöс пөрччөдисны, пуксьөдисны сцена вылö.

Лёва видзөдлис дед вылö да сэтшöма повзис, мый  
став тушаыс көдзавлi.

— Тайö сийö... Кыйсьысьыд...

Пöрысь мортöс төдисны и Федя да Коля, кодъяс  
пукалисны Лёвакөд орччөн. «Друг да төдас, яндзи-  
мысла сәки кувны ковмас»,— майшасис сьөлöмыс  
Колялөн. Сийö полис весиг видзөдлыны сцена вылö.

— Челядь, талун мян дорö локтис ыджыд  
гөсть, Модест Иванович Чарин,— заводитис сёрнит-  
ны вожатöй.— Сийö висьталас тiянлы, кызди уджа-  
лысь йöз ветымын во сайын тышкасисны выль олөм  
лөсьөдөм вöсна.

Ставөн кутисны клопайтны кияснас. Модест Ива-  
нович сувтис кузь пызан помö, малыштис чукырöсь  
кияснас паськыд тошсö, сәсся вöлисти мөдис варо-  
витны. А висьталис сийö унатор; и кызди штурмуйт-  
лөмаöсь Зимнөй дворец, и кызди нөйтлөмаöсь бе-  
логвардеецъясöс да ыли муясысь волөм буржуйясöс.  
Уна пара син видзөдисны ичөтик тушаа коммунист  
вылö, пельяссö чошкөдөмөн кывзисны сылысь быд  
кыв. Сöмын Лёвалөн да Колялөн синъясыс оз вер-  
мыны видзөдны дед вылö, яндзимысла багралисны  
пельясныс и чужöмныс.

Кор Модест Иванович помалис висьталөмсö, во-  
жатöй öшөдис сылы сьылиас пионеръяслысь гөрд  
галстук.

Гөсть копыртліс дзормөм юрсө велөдчысьяслань да чугрөдіс водзлань кисө.

— Тіянлы, дона челядь, нуөдны водзө миянөн заводитлөм уджсө.

И бара сылы клопайтісны.

Тайө рытнас Лёва да Коля дыр вашкөдчисны, мый налы вөчны гусялөм черинас, кызди шыльөдны лёкторсө, кодөс вөчисны пөрысь мортлы.

— Ме сәсся дзик некор ог кут пакөститчыны. Вот аддзылан, — нурбыльтіс Коля Сватов.

— И ме...

Тадзи помасис тайө сьөкыд сёрниис.

## ЮРИНДАЛЫСЬ

Тылён гусяторъяс . . . . .	3
Бурсиём . . . . .	5
Юромка ю дорын . . . . .	9
Ас кокъяснас локтис . . . . .	14
Гөрба ныра лэбач . . . . .	19
Пёрысь пожом . . . . .	23
Вөралысь да геологъяс . . . . .	24
Визувтёны нимтём шоръяс . . . . .	30
Медводдза лым . . . . .	33
Вөркань . . . . .	34
Паньё грездын . . . . .	38
Дзоридзалё сирень . . . . .	42
Ва воссяс — сёян вежсяс . . . . .	44
Пукалыштамёй юяс да тыяс дорын	47
Сёр арын . . . . .	50
Шуда кыснан . . . . .	52
Асыв төв — лёк төв . . . . .	57
Медся винёв чери . . . . .	61
Кельчиюд од чери жё . . . . .	63
Каникульяс дырйи . . . . .	66

**Иван Васильевич Коданёв**

**СЕКРЕТЫ ОЗЕРА**

**Рассказы на коми языке**

**Художник В. М. Пунегов**

Редактор В. А. Попов

Худож. редактор М. П. Безносков.

Техн. редактор И. Цивунии

Корректор Е. П. Сидорова

Сдано в набор 5/VI-1970 г. Подписано к печати  
27/VIII-1970 г. Формат 70×108<sup>1</sup>/<sub>32</sub>. Бум. л. 1,13.  
Печ. л. 3,08. (Уч.-изд. л. 2,83). Заказ № 3404.  
Ц01494. Тираж 1300. Цена 9 коп. Бумага № 1.

Коми книжное издательство. Дом печати.

г. Сыктывкар, Республиканская типография  
Управления по печати при Совете Министров  
Коми АССР.



9 кбп.

КОМИ КНИЖНОЙ ИЗДАТЕЛЬСТВО

1970